

四庫全書

史部

欽定四庫全書

史部

春秋戰國異辭卷五十一

詳校官編修_臣曹錫齡

編修_臣裴謙覆勘

總校官庶吉士_臣倉聖脉

校對官中書_臣李斯咏

謄錄監生_臣王鉞

欽定四庫全書

春秋戰國異辭卷五十一

右春坊右諭德陳厚耀撰

趙

孝成王

孝成王元年秦伐我拔三城

趙王新立太后用事秦急攻之趙氏求救于齊齊曰必

以長安君為質兵乃出太后不肯

太后惠文后也長安君其少子也

大

臣強諫太后明謂左右曰復言長安君為質者老婦必唾其面左師觸讐願見太后太后盛氣而胥之入徐趨而坐自謝曰老臣病足曾不能疾走不得見久矣竊自恕而恐太后體之有所苦也故願望太后太后曰老婦恃輦而行曰食得毋衰乎曰恃粥耳曰老臣間者殊不欲食乃強步日三四里少益嗜食和于身也太后曰老婦不能太后不和之色少解左師公曰老臣賤息舒祺最少不肖而臣衰竊憐愛之願得補黑衣之缺以衛王

宮昧死以聞太后曰敬諾年幾何矣對曰十五歲矣雖少願及未填溝壑而託之太后曰丈夫亦愛憐少子乎

對曰甚於婦人太后曰婦人異甚對曰老臣竊以為媼

春秋後語媼字俱作太后

之愛燕后賢於長安君太后曰君過矣不

若長安君之甚左師公曰父母愛子則為之計深遠媼之送燕后也持其踵為之泣念其遠也亦哀之矣已行非不思也祭祀則祝之曰必勿使反豈非計長久為子孫相繼為王也哉太后曰然左師公曰今三世以前至

於趙主之子孫為侯者其繼有在者乎曰無有曰微獨
趙諸侯有在者乎曰老婦不聞也曰此其近者禍及其
身遠者及其子孫豈人主之子孫則不善哉位尊而無
功奉厚而無勞而挾重器多也今媼尊長安之位而封
之以膏腴之地多與之重器而不及今令有功于國一
旦山陵崩長安君何以自託于趙老臣以媼為長安君
之計短也故以為愛之不若燕后太后曰諾恣君之所
使之于是為長安君約車百乘質于齊齊兵乃出子義

聞之

于義趙之賢者

曰人主之子骨肉之親也猶不能持無功

之尊無勞之奉而守金玉之重也而況于予乎

與國策字句小

異

齊安平君田單將趙師而攻燕中陽拔之又攻韓注人拔之

二年惠文后卒 田單為相

空雄之遇秦趙相與約

空雄地名

約曰自今以來秦之所欲

為趙助之趙之所欲為秦助之居無幾何秦興兵攻魏

趙欲救之秦王不說使人讓趙王曰約曰秦之所欲為
趙助之趙之所欲為秦助之今秦欲攻魏而趙因欲救
之此非約也趙王以告平原君平原君以告公孫龍公
孫龍曰亦可以發使而讓秦王曰趙欲救之今秦王獨
不助趙此非約也

呂覽
淫辭

子高衣長裙振袂袖方履麤屨

屨扇也

見平原君平原君

曰吾子亦儒服乎子高曰此布衣之服非儒服也儒服
非一也平原君曰請吾子言之答曰夫儒者居位行道

則有袞冕之服統御師旅則有介冑之服從容徒步則有若穿之服故曰非一也平原君曰儒之為名何取爾

子高曰取包衆美兼六藝動靜不失中道

孔叢子中

子高遊趙平原君客有鄒文季節者與子高相善及將還魯諸故人訣既畢文節送行三宿臨別文節流涕交頤子高徒抗手而已分背就路其徒問曰先生與彼二子善彼有戀戀之心未知後會何期悽愴流涕而先生厲聲高揖此無乃非親親之謂乎子高曰始焉謂此二

子丈夫爾乃今知其婦人也人生則有四方之志豈鹿豕也哉而長聚乎其徒曰若此二子之泣非邪答曰斯二子良人也有不忍之心若于取斷必不足矣其徒曰凡泣者一無取乎子高曰有二焉大姦之人以泣自信

婦人懦夫以泣著愛

孔叢子中

平原君問子高曰吾聞子之先君親見衛夫人南子又云南遊遇乎阿谷而交辭於漂女信有之乎答曰士之相信聞流言而不信者何哉以其所已行之事占之也

昔先君在衛衛君問軍旅焉拒而不告問不已攝駕而

去

攝取也

衛君請見猶不能終何夫人之能覲乎古者大

饗夫人與焉于時禮儀雖廢猶有行之者意衛君夫人

饗夫子則夫子亦弗獲已矣若夫阿谷之言起于近世

殆是假其類以行其心者之為也

孔叢子中

平原君與子高飲强子高酒曰昔有遺諺堯舜千鍾孔

子百觚子路嗑嗑尚飲十榼古之聖賢無不能飲也吾

子何辭焉子高曰以穿所聞賢聖以道德無人未聞以

飲食也平原君曰即如先生所言則此言何生子高曰
生于嗜酒者蓋其勸厲獎戲之辭非實然也平原君欣
然曰吾不戲子無所聞此雅言也

孔叢
子中

李寅言曹良于平原君欲仕之平原君以問子高子高
曰不識也平原君曰良嘗得見於先生矣故敢問子高
曰世人多自稱上用我則國無患夫用智莫若觀其身
其身猶不免于患國用之亦烏得無患乎平原君曰良
之有患時不明也居家理治可移于官良能殖貨故欲

仕之子高曰未可知也今有人于此身脩計明而貧者
志不存也身不修會計闇而富者非盜無所得之也

孔叢

子中

公孫龍又與子高記論于平原君所辨而理至于臧三
耳公孫龍言臧之三耳甚辨析子高弗應俄而辭出明
日復見平原君曰疇昔公孫之言信辨也先生寔以為
何如答曰然幾能臧三耳矣雖然實難僕願得有問於
君今為臧三耳甚難而寔非也謂臧兩耳甚易而寔是

也不知君將從易而是者乎亦從難而非者乎平原君弗能應明日謂公孫龍曰公無復與孔子高辨事也其人理勝于辭公辭勝于理辭勝於理終必受訕

孔叢子中呂

覽浮辭

公孫龍者平原君之客好刑名以白馬為非白馬或謂

子高曰

子高孔穿之字孔箕之子伋之玄孫

此人小辨而毀大道子盍往

正諸子高曰大道之悖天下之校枉也吾何病焉或曰

雖然子為天下故往也子高適趙與龍會平原君家謂

之曰僕居魯遂聞下風而高先生之行也願受業之日
久矣然所不取于先生者獨不取先生以白馬為非白
馬爾誠去非白馬之學則穿請為弟子公孫龍曰先生
之言悖也龍之學正以白馬非白馬者也今使龍去之
則龍無以教矣今龍為無以教而乃學於龍不亦悖乎
且夫學於龍者以智與學不逮也今教龍去白馬非白
馬是先教也而後師之不可也先生之所教龍者似齊
王之問尹文也齊王曰寡人甚好士而齊國無士尹文

曰今有人于此事君則忠事親則孝交友則信處鄉則順有此四行者可謂士乎王曰善是真吾所謂士者也尹文曰王得此人肯以為臣乎王曰所願不可得也尹文曰使此人于廣庭大衆之中見侮而不敢鬪王將以為臣乎王曰夫士也見侮而不敢鬪是辱則寡人不以為臣矣尹文曰雖見侮而不鬪是未失所以為士也然而王不以為臣則鄉所為士者乃非士乎夫王之令殺人者死傷人者刑民有畏王令故見侮終不敢鬪是全王

之法也而王不以為臣是罰之也且王以不敢鬪為辱
必以敢鬪為榮是王之所賞吏之所罰也上之所是法
之所非也賞罰是非相與曲謬雖十黃帝固所不能治
也齊王無以應且白馬非白馬者乃子先君仲尼之所
取也龍聞楚王張繁弱之弓載忘歸之矢以射蛟兕于
雲夢之囿反而喪其弓左右請求之王曰止也楚人遺
弓楚人得之又何求乎仲尼聞之曰楚王仁義而未遂
亦曰人得之而已矣何必楚乎若是者仲尼異楚人于

所謂人也夫是仲尼之異楚人于所謂人而非龍之異
白馬于所謂馬悖也先生好儒術而非仲尼之所取也
欲學而使龍去所以教雖百龍之智固不能當前也子
高莫之應退而告人曰言非而博巧而不理此固無所
不答也異日平原君會衆賓而延子高平原君曰先生
聖人之後也不遠千里來顧臨之欲去夫公孫子白馬
之學今是非未分而先生翻然欲高逝可乎子高曰理
之至精者則自明之豈任穿之退哉平原君曰至精之

說可得聞乎答曰其說皆取之經傳不敢以意春秋記
六鵠退飛覩之則六察之則鵠鵠猶馬也六猶白也覩
之得見其白察之則知其馬色以名別內由外顯謂之
白馬名寔當矣若以絲麻加之女工為緇素青黃色名
雖殊其質則一是以詩有素絲不曰絲素禮有緇布不
曰布緇攬牛玄武此類甚衆先舉其色後名其質萬物
之所同聖賢之所常也君子之謂貴當物理不貴繁辭
若尹文之折齊王之所言與其法錯故也穿之所說于

公孫子高其智悅其行也去白馬之說智行固存是則
穿未失其所師者也稱此云云沒其理也是楚王之言
楚人亡弓楚人得之先君夫子探其本意欲以示廣其
實狹之故曰不如亦曰人得之而已也是則異楚王之
所謂楚非異楚王之所謂人也以此為喻乃相擊切矣
凡言人者總謂人也亦猶言馬者總謂馬也楚自國也
白自色也欲廣其人宜在去楚欲正名色不宜去白忱
察此理則公孫之辯破矣平原君曰先生言于理善矣

因顧謂衆賓曰公孫子能答此乎燕客史由對曰辭則

有焉理則否矣

孔叢
子中

公孫龍在趙之時謂弟子曰人而無能者龍不能與遊
有客衣褐帶索而見曰臣能呼公孫龍謂弟子曰門下
故有能呼者乎對曰無有公孫龍曰與之弟子之籍後
數日往說燕王至于河上而航在一汜

一汜或
作水北

使善呼

者呼之一呼而航來故曰聖人之處世不逆有伎能之

士

淮南子
道應

欽定四庫全書

卷五十一

孫卿與臨武君

臨武君蓋楚將

議兵于趙孝成王之前王曰敢

問兵之要臨武君曰夫兵之要上得天時下得地利觀敵之變動後之發先之至此兵之要也孫卿曰不然臣聞古用兵之要在附親士民而已六馬不和則造父不能以致遠弓矢不調則羿不能以中微士民不親附則湯武不能以戰勝由此觀之要在附親士民而已矣臨武君曰不然夫兵之用變故也其所貴謀詐也善用之者猶脫兔莫知其用孫吳用之無敵于天下由此觀之

豈待親士民而後可哉孫卿曰不然子之所道者諸侯
之兵謀臣之事也臣之所道者仁人之兵聖王之事也
彼可詐者必怠慢者也君臣上下之際渙然有離德者
也夫以跖而詐桀猶有工拙焉以桀而詐堯如以指撓
沸以卵投石抱羽毛而赴烈火入則燋沒耳夫何可詐
也且夫暴國之君將孰與至哉彼其所與至者必欺其
民民之親我也若椒蘭歡如父子彼顧其上如憎毒
蜂蠆之人雖桀跖豈肯為其所至惡而賊其所至愛哉

是猶使人之子孫自賊其父母也彼則先覺其失何可
詐哉且仁人之兵聚則成卒散則成列鋌則若莫邪之
利刃嬰之者斷銳則若莫邪之利鋒當之者潰圓居則
若邱山之不可移也方居則若盤石之不可拔也觸之
摧角折節而退爾夫何可詐也詩曰武王載旆有虔秉
鉞如火烈烈則莫我敢曷此謂湯武之兵也孝成王避
席仰首曰寡人雖不敏請依先生之兵也

韓詩卷三
又荀子議兵

同畧

史記

白起傳

秦昭王之四十五年伐韓之野王野王降

秦上黨道絕其守馮亭與民謀曰鄭道已絕韓必不可得為民秦兵日進韓不能應不如以上黨歸趙趙若受我秦怒必攻趙趙被兵必親韓韓趙為一則可以當秦因使人報趙趙孝成王與平陽君平原君計之平陽君曰不如勿受受之禍大于所得平原君曰無故得一郡受之便趙受之因封馮亭為華陽君

孝成王四年王夢衣偏褰之衣乘飛龍上天不至而墜

見金玉之積如山明日王召筮史敢占之曰夢衣偏褻
衣者殘也乘飛龍上天不至而墜者有氣而無實也見
金玉之積如山者憂也後三日韓氏上黨守馮亭使者
至曰

以上亦見國策而小異

韓不能守上黨入之于秦其吏民皆

安為趙不欲為秦有城市邑十七願再拜入之趙聽王
所以賜吏民王大喜召平陽君豹告之曰馮亭入城市
邑十七受之何如對曰聖人甚禍無故之利王曰人懷
吾德何謂無故乎對曰夫秦蠶食韓氏地中絕不令相

通固自以為坐而受上黨之地也韓氏所以不入于秦者欲嫁其禍于趙也秦服其勞而趙受其利雖彊大不能得之于小弱小弱顧能得之于强大乎豈可謂非無故之利哉且夫秦以牛田之水通糧蠶食上乘倍戰者裂上國之地其政行不可與為難必勿受也王曰今發百萬之軍而攻踰年歷歲未得一城也今以城市邑十七幣吾國此大利也趙豹出王召平原君與趙禹而告之對曰發百萬之軍而攻踰歲未得一城今坐受城市

邑十七此大利不可失也王曰善乃令趙勝受地告馮
亭曰救國使者臣勝救國君使勝致命以萬戶都三封
太守千戶都三封縣令皆世世為侯吏民皆益爵三級
吏民能相安皆賜之六金馮亭垂涕不見使者曰吾不
處三不義也為主守地不能死固不義一矣入之秦不
聽主令不義二矣賣主地而食之不義三矣趙遂發兵
取上黨廉頗將軍軍長平

史趙世家與
國策小異

嚴尤三將論 趙孝成王曰誰能當武安君平原君

曰澠池之會臣察武安君小頭而銳瞳子白黑分明
視瞻不轉小頭而銳敢斷行也目黑白分明見事明
也視瞻不轉執志強也可與持久難與爭鋒廉頗足
以當之

孝成王七年秦與趙兵相距長平時趙奢已死而藺相
如病篤趙使廉頗將攻秦秦數敗趙軍趙軍固壁不戰
秦數挑戰廉頗不肯趙王信秦之間秦之間言曰秦之
所惡獨畏馬服君趙奢之子趙括為將耳趙王因以括

為將代廉頗藺相如曰王以名使括若膠柱而鼓瑟耳
括徒能讀其父書傳不知合變也趙王不聽遂將之趙
括自少時學兵法言兵事以天下莫能當嘗與其父奢
言兵事奢不能難然不謂善括母問奢故奢曰兵死地
也而括易言之使趙不將括即已若必將之破趙軍者
必括也及括將行其母上書言于王曰括不可使將王
曰何以對曰始妾事其父時為將身所奉飯飲而進食
者以十數所友者以百數大王及宗室所賞賜者盡以

予軍吏士大夫受命之日不問家事今括一旦為將東
向而朝軍吏無敢仰視之者王所賜金帛歸藏于家而
日視便利田宅可買者買之王以為何如其父父子異心
願王勿遣王曰母置之吾已決矣括母因曰王終遣之
即有如不稱妾得無隨坐乎王許諾趙括既代廉頗悉
更約束易置軍吏秦將白起聞之縱奇兵佯敗走而絕
其糧道分斷其軍為二士卒離心四十餘日軍餓趙括
出銳卒自搏戰秦軍射殺趙括括軍敗數十萬之衆遂

降秦秦悉坑之趙前後所亡凡四十五萬

地志山西高平縣有丹山

相傳白起坑趙卒于此流血成川故名又有省冤谷亦此地

趙王亦以括毋先言竟

不誅也

史廉頗傳

孔叢子

子高以為趙平原君霸世之士惜其不遇

時也其子子順以為衰世之好事公子無霸相之才

也申叔問子順曰子之家公有道先生既論之矣今

易之是非焉在答曰言貴盡心亦各抒其所見也若是

非則明智者裁之

史虞卿虞卿者游說之士也躡蹻擔簦說趙孝成王

傳

一見賜黃金百鎰白璧一雙再見為趙上卿故號為
虞卿秦趙戰於長平趙不勝亡一都尉趙王召樓昌
與虞卿曰軍戰不勝尉復死寡人使束甲而趨之何
如樓昌曰無益也不如發重使為媾虞卿曰昌言媾
者以為不媾軍必破也而制媾者在秦且王之論秦
也欲破趙之軍乎不邪王曰秦不遺餘力矣必且欲
破趙軍虞卿曰王聽臣發使出重寶以附楚魏楚魏

欲得王之重寶必內吾使趙使入楚魏秦必疑天下之合從且必恐如此則媾乃可為也趙王不聽與平陽君為媾發鄭朱入秦秦內之趙王召虞卿曰寡人使平陽君為媾於秦秦已內鄭朱矣卿以為奚如虞卿對曰王不得媾軍必破矣天下賀戰勝者皆在秦矣鄭朱貴人也入秦秦王與應侯必顯重以示天下楚魏以趙為媾必不救王秦知天下不救王則媾不可得成也應侯果顯鄭朱以示天下賀戰勝者終不

肯媾長平大敗遂圍邯鄲為天下笑

七年王悔不聽趙豹之計故有長平之禍焉王還不聽

秦秦圍邯鄲

在九年

秦之圍邯鄲

秦昭王也

趙使平原君求救

合從于楚

史年表在趙孝成王九年

約與食客門下有勇力文武備

具者二十八偕平原君曰使文能取勝則善矣文不能

取勝則歃血于華屋之下必得定從而還士不外索取

于食客門下足矣得十九人餘無可取者無以滿二十

人門下有毛遂者前自贊于平原君曰遂聞君將合從

於楚約與食客門下二十人偕不外索今少一人願君
即以遂備員而行矣平原君曰先生處勝之門下幾年
于此矣毛遂曰三年于此矣平原君曰夫賢士之處世
也譬若錐之處囊中其末立見今先生處勝之門下三
年于此矣左右未有所稱誦勝未有所聞是先生無所
有也先生不能先生留毛遂曰臣乃今日請處囊中耳
使遂早得處囊中乃穎脫而出非特其末見而已平原
君乃竟與毛遂偕十九人相與目笑之而未發也毛遂

比至楚與十九人論議十九人皆服平原君與楚合從
言其利害日出而言之日中不決十九人謂毛遂曰先
生上毛遂按劍歷階而上謂平原君曰從之利害兩言
而決耳今日出而言從日中不決何也楚王謂平原君
曰客何為者也平原君曰是勝之舍人也楚王叱曰胡
不下吾乃與而君言汝何為者也毛遂按劍而前曰王
之所以叱遂者以楚國之衆也今十步之內王之命懸
于遂手吾君在前叱者何也且遂聞湯以七十里之地

王天下文王以百里之壤而臣諸侯豈其士卒衆多哉
誠能據其勢而奮其威今楚地方五千里持戟百萬此
霸王之資也以楚之強天下弗能當白起小豎子耳率
數萬之衆興師以與楚戰一戰而舉鄢郢再戰而燒夷
陵三戰而辱王之先人此百世之怨而趙之所羞而王
弗知惡焉合從者為楚非為趙也吾君在前叱者何也
楚王曰唯唯誠若先生之言謹奉社稷而以從毛遂曰從
定乎楚王曰定矣毛遂謂楚王之左右曰取雞狗馬之血

來毛遂奉銅盤而跪進之楚王曰王當歃血而定從次者吾君次者遂遂定從于殿上毛遂左手持盤血而右手招十九人曰公相與歃此血于堂下公等錄錄所謂因人成事者也平原君已定從而歸歸至于趙曰勝不敢復相士勝相士多者千人自以為不失天下之士今乃於毛先生而失之也毛先生一至楚而使趙重于九鼎大呂毛先生以三寸之舌強于百萬之師勝不敢復相士遂以為上客

史平原君傳

史平原君傳 平原君者趙勝趙之諸公子也諸子
中勝最賢喜賓客賓客至者數千人平原君相趙惠
王及孝成王三去相三復位封于東武城平原君家
樓臨民家民家有覽者繫散行汲平原君美人居樓
上臨見大笊之明日覽者至平原君門請曰臣聞君
之喜士士不遠千里而至者以君能貴士而賤妾也
臣不幸有罷癰之病而君之後宮臨而笑臣臣願得
笑臣者頭平原君笑應曰諾覽者去平原笑曰觀此

豎子乃欲以一笑之故殺吾美人不亦甚乎終不殺
居歲餘賓客門下舍人稍稍引去者過半平原君怪
之曰勝所以待諸君者未嘗敢失禮而去者何多也
門下一人前對曰以君之不殺笑躡者以君為愛色
而賤士士即去耳於是平原君乃斬笑躡者美人頭
自造門進躡者因謝焉其後門下乃復稍稍來是時
齊有孟嘗魏有信陵楚有春申故爭相傾以待士

平原君既返趙楚使春申君將兵赴救趙魏信陵君亦

矯奪晉鄙軍往救趙皆未至秦急圍邯鄲邯鄲急且降

平原君甚患之邯鄲傳舍吏子李同

一名談

說平原君曰

君不憂趙亡耶平原君曰趙亡則勝為虜何為不憂乎

李同曰邯鄲之民炊骨易子而食可謂急矣而君之後宮以百數婢妾被綺縠餘粱肉而民褐衣不完糟糠不厭民困兵盡或剡木為矛矢而君器物鍾磬自若使秦破趙君安得有此使趙得全君何患無有今君誠能令夫人以下編于士卒之間分功而作家之所有盡散以

饗士士方其危苦之時易德耳于是平原君從之得敢
死之士三千人李同遂與三千人赴秦軍秦軍為之却
三十里亦會楚魏救至秦兵遂罷邯鄲復存李同戰死
封其父為李侯

史平原君傳 又說
苑復思李同作李談

史記

魯仲
連傳

魯仲連者齊人也好奇偉倣儻之畫策而

不肯仕宦任職好持高節游于趙趙孝成王時而秦
王使白起破趙長平之軍前後四十餘萬秦兵遂東
圍邯鄲趙王恐諸侯之救兵莫敢擊秦軍魏安釐王

使將軍晉鄙救趙畏秦止于蕩陰不進魏王使客將
軍辛垣衍間入邯鄲因平原君謂趙王曰秦所為急
圍趙者前與齊湣王爭強為帝已而復歸帝今齊湣
王已弱方今惟秦雄天下此非必貪邯鄲其意欲復
求為帝趙誠發使尊秦昭王為帝秦必喜罷兵去平
原君猶豫未有所決此時魯仲連適游趙會秦圍趙
聞魏將欲令趙尊秦為帝乃見平原君曰事將奈何
平原君曰勝也何敢言事前亡四十萬之衆於外今

又內圍邯鄲而不能去魏王使客將軍辛垣衍令趙
帝秦今其人在是勝也何敢言事魯仲連曰吾始以
君為天下之賢公子也吾乃今然後知君非天下之
賢公子也梁客辛垣衍安在吾請為君責而歸之平
原君曰勝請紹介而見之于先生平原君遂見辛垣
衍曰東國有魯仲連先生者今其人在此勝請為紹
介交之于將軍辛垣衍曰吾聞魯仲連先生齊國之
高士也衍人臣也使事有職吾不願見魯仲連先生

平原君曰勝既已泄之矣辛垣衍許諾魯連見新垣
行而無言辛垣衍曰吾視居此圍城之中者皆有求
于平原君者也今吾觀先生之玉貌非有求于平原
君者也曷為久居此圍城之中而不去魯仲連曰世
以鮑焦為無從容而死者皆非也衆人不知則為一
身彼秦者棄禮義而上首功之國也權使其士虜使
其民彼即肆然而為帝過而為政于天下則連有蹈
東海而死耳吾不忍為之民也所為見將軍者欲以

助趙也辛垣衍曰先生助之將奈何魯連曰吾將使
梁及燕助之齊楚則固助之矣辛垣衍曰燕則吾請
以從矣若乃梁者則吾乃梁人也先生惡能使梁助
之魯連曰梁未睹秦稱帝之害故耳使梁睹秦稱帝
之害則必助趙矣辛垣衍曰秦稱帝之害何如魯連
曰昔者齊威王嘗為仁義矣率天下諸侯而朝周周
貧且微諸侯莫朝而齊獨朝之居歲餘周烈王崩齊
後往周怒赴于齊曰天崩地坼天子下席東藩之臣田

嬰齊後至則斲齊威王勃然怒曰叱嗟而母婢也卒
為天下笑故生則朝周死則叱之誠不忍其求也彼
天子固然其無足恠辛垣衍曰先生獨不見夫僕乎
十人而從一人者寧力不勝而智不若邪畏之也魯
仲連曰嗚呼梁之比于秦若僕邪辛垣衍曰然魯仲
連曰吾將使秦王烹醢梁王辛垣衍怏然不悅曰噫
嘻亦大甚矣先生之言也先生又惡能使秦王烹醢
梁王魯仲連曰固也吾將言之昔者九侯鄂侯文王

紂之三公也九侯有子而好獻之于紂紂以為惡醢
九侯鄂侯爭之彊辯之疾故脯鄂侯文王聞之喟然
而嘆故拘之羑里之庫百日欲令之死曷為與人俱
稱王卒就脯醢之地齊湣王將之魯夷維子為執策
而從謂魯人曰子將何以待吾君魯人曰吾將以十
太牢待子之君夷維子曰子安取禮而來吾君彼吾
君者天子也天子巡狩諸侯辟舍納管籥攝衽抱几
視膳于堂下天子已食乃退而聽朝也魯人投其籥

不果納不得入于魯將之薛假途于鄒當是時鄒君死湣王欲入弔夷維子謂鄒之孤曰天子弔主人必將倍殯棺設北面于南方然後天子南面弔也鄒之羣臣曰必若此吾將伏劍而死故不敢入于鄒鄒魯之臣生則不得事養死則不得賻祔然且欲行天子之禮於鄒魯鄒魯之臣不果納今秦萬乘之國也梁亦萬乘之國也俱據萬乘之國各有稱王之名睹其一戰而勝欲從而帝之是使三晉之大臣不如鄒魯

之僕妾也且秦無已而帝則且變易諸侯之大臣彼將奪其所不肖而與其所賢奪其所憎而與其所愛彼又將使其子女讒妾為諸侯妃姬處梁之宮梁王安得晏然而已乎而將軍又何以得故寵乎於是辛垣衍起再拜謝曰始以先生為庸人吾乃今日知先生為天下之士也吾請出不敢復言帝秦秦將聞之為却軍五十里適會魏公子無忌奪晉鄙軍以救趙擊秦軍秦軍遂引而去于是平原君欲封魯連魯連

辭讓使者三終不肯受平原君乃置酒酒酣起前以千金為魯連壽魯連笑曰所謂貴于天下之士者為人排患釋難解紛亂而無取也即有取者是商賈之事也而連不忍為也遂辭平原君而去終身不復見

漢書儒家魯連十四篇

八年平原君如楚請救還楚來救及魏公子無忌亦來

救秦圍邯鄲解

趙世家 年表在九年

史記虞卿傳

秦既解邯鄲圍而趙王入朝使趙郝約事

於秦割六縣而媾虞卿謂趙王曰秦之攻王也倦而歸乎王以其力尚能進愛王而弗攻乎王曰秦之攻我也不遺餘力矣必以倦而歸也虞卿曰秦以其力攻其所不能取倦而歸王又以其力之所不能取以送之是助秦自攻也來年秦復攻王王無救矣王以虞卿之言告趙郝趙郝曰虞卿誠能盡秦力之所至乎誠知秦力之所不能進此彈丸之地弗予令秦來年復攻王王得無割其內而媾乎王曰請聽子割矣

子能必使來年秦之不復攻我乎趙郝對曰此非臣之所敢任也他日三晉之交于秦相善也今秦善韓魏而攻王王之所以事秦必不如韓魏也今臣為足下解負親之攻開闕通幣齊交韓魏至來年而王獨取攻于秦此王之所以事秦必在韓魏之後也此非臣之所敢任也王以告虞卿虞卿對曰郝言不媾來年秦復攻王王得無割其內而媾乎今媾郝又以不能必秦之不復攻也今雖割六城何益來年復攻又

割其力之所不能取而媾此自盡之術也不如無媾
秦雖善攻不能取六縣趙雖不能守終不失六城秦
倦而歸兵必罷我以六城收天下以攻罷秦是我失
之于天下而取償于秦也吾國尚利孰與坐而割地
自弱以彊秦哉今郝曰秦善韓魏而攻趙者必以為
韓魏不救趙也而王之軍必孤又以王之事秦不如
韓魏也是使王歲以六城事秦也即坐而城盡來年
秦復求割地王將與之乎弗與是棄前功而挑秦禍

也與之則無地而給之語曰彊者善攻弱者不能守
今坐而聽秦秦兵不弊而多得地是彊秦而弱趙也
以益彊之秦而割愈弱之趙其計故不止矣且王之
地有盡而秦之求無已以有盡之地而給無已之求
其勢必無趙矣趙王計未定樓緩從秦來趙王與樓
緩計之曰予秦地何如毋子孰吉緩辭讓曰此非臣
之所能知也王曰雖然試言公之私樓緩對曰王亦
聞夫公甫文伯母乎公甫文伯仕于魯病死女子為

自殺于房中者二人其母聞之弗哭也其相室曰焉
有子死而弗哭者乎其母曰孔子賢人也逐于魯而
是人不能隨也今死而婦人爲之自殺者二人若是者
必其于長者薄而於婦人厚也故從母言之是爲賢
母從妻言之是必不免爲妬妻故其言一也言者異
則人心變矣今臣新從秦來而言勿子則非計也言
子之恐王以臣爲爲秦也故不敢對使臣得爲大王
計不如予之王曰諾虞卿聞之入見王曰此飾說也

王脊勿子樓緩聞之往見王王又以虞卿之言告樓緩對
曰不然虞卿得其一不得其二夫秦趙構難而天下
皆說何也曰吾且因彊而乘弱矣今趙兵困于秦天
下之賀戰勝者則必盡在于秦矣故不如急割地為
和以疑天下而慰秦之心不然天下將因秦之強怒
乘趙之弊瓜分之趙且亡何秦之圖乎故曰虞卿得
其一不得其二願王以此決之勿復計也虞卿聞之
往見王曰危哉樓子之所以為秦者是愈疑天下而

何慰秦之心哉獨不言其示天下弱乎且臣言勿予者非固勿予而已也秦索六城于王而王以六城賂齊齊秦之深讐也得王之六城并力西擊秦齊之聽王不待辭之畢也則是王失之于齊而取償于秦也而齊趙之深讐可以報矣而示天下有能為也王以此發聲兵未窺于境臣見秦之重賂至趙而反媾于王也從秦為媾韓魏聞之必盡重王重王必出重寶以先于王則是王一舉而結三國之親而與秦易道

也趙王曰善則使虞卿東見齊王與之謀秦虞卿未
返秦使者已在趙矣樓緩聞之亡去趙于是封虞卿
以一城居頃之而魏請為從趙孝成王召虞卿謀過
平原君平原君曰願君之論從也虞卿入見王王曰
魏請為從對曰魏過王曰寡人固未之許對曰王過
王曰魏請從卿曰魏過寡人未之許又曰寡人過然
則從終不可乎對曰臣聞小國之與大國從事也有
利則大國受其福有敗則小國受其禍今魏以小國

請其禍而王以大國辭其福臣故曰王過魏亦過

語亦

見國策而互異

竊以為從便王曰善乃合魏為從虞卿既以

魏齊之故

詳秦范雎事

不重萬戶侯卿相之印與魏齊間

行卒去趙困于梁魏齊已死不得意乃著書上採春

秋下觀近世曰節義稱號揣摩政謀凡八篇以刺譏

國家得失世傳之曰虞氏春秋

藝文志曰十五篇史虞卿傳

虞卿著書名曰春秋魏齊曰子無然也春秋孔聖所以名經也今子之書大抵談說而已亦以為名何答

曰經者取其事常也可常則為經矣且不為孔子其
無經乎齊問子順子順曰無傷也魯之史記曰春秋
經因以為名焉又晏子之書亦曰春秋吾聞泰山之
上封禪者七十有二君其見稱述數不盈十所謂貴

賤不嫌同名也

孔叢
子中

虞卿欲以信陵君之存邯鄲為平原君請封公孫龍
聞之夜駕見平原君曰龍聞虞卿欲以信陵君之存
邯鄲為君請封有之乎平原君曰然龍曰此甚不可

且王舉君而相趙者非以君之智能為趙國無有也
割東武城而封君者非以君為有功也而以國人無
勛乃以君為親戚故也君受相印不辭無能割地不
言無功者亦自以為親戚故也今信陵君存邯鄲而
請封是親戚受城而國人計功也此甚不可且虞卿
操其兩權事成操右券以責事不成以虛名德君君
必勿聽也平原君遂不聽虞卿

語亦見國策而多

平原君厚

待公孫龍公孫龍善為堅白之辯及鄒衍過趙言至

道乃絀公孫龍

史平原君傳

劉向別錄 齊使鄒衍過趙平原君見公孫龍及其徒綦母子之屬論白馬非白馬之辯以問鄒子鄒子曰不可彼天下之辯有五勝三至而辭正為下辯者別殊類使不相害序異端使不相亂抒意通指明其所謂使人與知焉不務相迷也故勝者不失其所守不勝者得其所求若是故辯可為也及至煩文以相假飾辭以相悖巧譬以相移引人聲使不得及其意

如此害大道夫繳紛爭言而競後息不能無害君子

坐皆稱善

史平原君傳小註引

十年燕攻昌壯

壯當作城此時屬趙

五月拔之

趙將樂乘慶舍

攻秦信梁軍破之

信梁蓋王齮號也

太子死

秦攻西州拔

之

州注作周

徒父祺出

十一年城元氏縣上原

武陽君鄭安平死

故秦降將也

收

其地

十二年邯鄲廕燒

廕積藟藁之所以上史趙世家

趙王問子順曰寡人聞孔氏之世自正考父以來儒林相繼仲尼重之以大聖自茲以降世業不替天下諸侯咸資禮焉先生承其緒作二國師從古及今載德流聲未有若先生之嗣率由前訓將與天地相救矣答曰若先祖父並稟聖人之性如君王之言也至如臣者學行不敏寄食于趙祿仕于魏幸遇二國之君寬以容之若乃師也未敢承命假令賴君之願後世克祚不忝前人不泯祖業豈徒一家之賜哉亦天下之慶也王曰必然

必然

孔叢
子中

趙王問相于平原君平原君曰鄒文可

趙人

王曰其行如

何對曰夫孔子高天下之高士也取友以行交游以道
文與之遊稱曰好義王其用之王卒不用後以平原君
言問子順且曰先生知之乎答曰先父之所交也何敢
不知王曰寡人雖失之在前猶願聞其行于先生也答
曰行不苟合雖賤不渝君子人也王遂禮之固以老辭

孔叢

子中

齊攻趙圍廩丘趙使孔青帥五萬擊之克齊軍獲尸三萬趙王詔勿歸其尸將以困之子順聘趙問王曰不歸尸其困何也曰其父兄弟悲苦無已廢其產也子順曰非所以困之也死一也歸尸與不悲苦胡異焉以臣愚計貧齊之術乃宜歸尸王曰何謂對曰使其家遠來迎尸不得事農一費也歸所葬使其送死終事二費也二年之中喪卒三萬三費也欲無困貧不能得已王曰善既而齊大夫聞其子順之謀曰君子之謀其利溥哉

孔叢
于中

呂覽

不廣

齊攻廩丘趙使孔青將死士而救之與齊

人戰大敗之齊將死得車二千得尸三萬以為京

京觀

也甯越謂孔青曰

甯越趙之
中牟人

惜矣不如歸尸以內攻

之趙聞之古善戰者沙隨賁服

沙隨猶相守不進不
却賁置也服退也

却舍延尸

却舍以緩其尸使人
得收葬以盡其財

車甲盡于戰府庫盡

于葬此之謂內攻之孔青曰敵齊不尸則如何甯越
曰戰而不勝其罪一與人出而不與人入其罪二與

之尸而弗取其罪三民以此三者怨上無以使下下
無以事上是之謂重攻之

趙孝文王問曰昔伊尹為臣而放其君其君不怨何行
而得乎此也子順答曰伊尹執人臣之節而弼其君以
禮亦行此道而已矣王曰方以放君為名而先生稱禮
何也子順曰以禮括其君使入于善也曰其說可得聞
乎答曰其在商書太甲嗣立而干冢宰之政伊尹曰惟
王舊行不義習與性成予不狎于不順王始即桐廬于

先王其訓罔以後人迷王往居憂允思厥祖之明德是
言太甲在喪不明乎人子之道而欲知政于是伊尹使
之居相近湯之墓處憂哀之地放之不俾知政三年服
竟然後反之即所以奉禮執節事太甲者也率其君以
義強其君以孝道未有行此見怨也王曰善哉我未之

聞也

孔叢子中 趙孝成王七年以子順為相尋以病免

十四年平原君趙勝死

史趙世家 年表在十五年

史

平原君傳

平原君以趙孝成王十五年卒子孫代後竟

趙俱亡

十五年以尉文封相國廉頗為信平君

尉文地名

燕王令丞

相栗腹約驪以五百金為趙王酒還歸報燕王曰趙氏壯者皆死長平其孤未壯可伐也王召昌國君樂間而問之對曰趙四戰之國也其民習兵伐之不可王曰吾以衆伐寡二而伐一可乎對曰不可王曰吾即以五而伐一可乎對曰不可燕王大怒群臣皆以為可燕卒起二軍車二千乘栗腹將而攻鄒卿秦將而攻代廉頗為

趙將破殺栗腹虜卿秦樂間

史趙世家

史

廉頗傳

自邯鄲圍解五年而燕用栗腹之謀舉兵擊

趙趙使廉頗將擊之大破燕軍於鄣殺栗腹遂圍燕
燕割五城請和乃聽之趙以尉文封廉頗為信平君
為假相國廉頗之免長平歸也失勢之時故客盡去
及復用為將客又復至頗曰客退矣客曰吁君何見
之晚也夫天下以市道交君有勢我則從君君無勢
則去此固其理也有何怨乎

十六年以樂乘為武襄君

十七年假相大將武襄君攻燕圍其國

十八年延陵鈞率師從相國信平君助魏攻燕 秦拔

我榆次三十七城

十九年趙與燕易土以龍兑汾門臨樂與燕燕以葛武

陽平舒與趙

二十年秦王政初立 秦拔我晉陽 使廉頗伐魏之

繁陽拔之

以上史
趙世家

二十一年孝成王卒子悼襄王立

名偃

使樂乘代廉頗頗

怒攻樂乘樂乘走廉頗遂奔魏之大梁

廉頗居梁久之魏不能信用趙以數困于秦兵思復

得廉頗廉頗亦思復用于趙趙王

悼襄王

使使者視廉

頗尚可用否廉頗之仇郭開多與使者金令毀之

趙使者既見廉頗廉頗為之一飯斗米肉十斤被甲

上馬以示尚可用趙使還報王曰廉將軍雖老尚善

飯然與臣坐頃之三遺矢矣趙王以為老遂不召楚

聞廉頗在魏陰使使迎之廉頗一為楚將無功曰我

思用趙人廉頗卒於壽春

史廉頗傳

悼襄王

悼襄王元年大備

行大備之禮
備疑當作醕

魏欲通平邑中牟之

道不成

中牟山之側二邑皆屬魏欲
渡黃河作道相通而不成也

二年李牧將攻燕拔武遂方城

李牧者趙之北邊良將也

孝成王時

常居代雁門備匈奴

以便宜置吏市租輸入幕府為士卒費日擊數牛享

士習射騎謹烽火多間諜厚遇戰士為約曰匈奴即
入盜急入收保有敢捕虜者斬匈奴每入烽火謹輒
入收保不敢戰如是數歲亦不亡失然匈奴以李牧
為怯雖趙邊兵亦以為吾將怯趙王讓李牧李牧如
故趙王怒召之使他人代將歲餘匈奴每來出戰出
戰數不利失亡多邊不得田畜復請李牧牧杜門不
出固稱疾趙王乃復彊起使將兵牧曰王必用臣臣
如前乃敢奉令王許之李牧至如故約匈奴數歲無

所得終以為怯邊士日得賞賜而不用皆願一戰于

是乃具選車得千三百乘選騎得萬三千匹百金之

士五萬人

能破敵者
賞百金

穀者十萬人悉勒習戰大縱畜

牧人民滿野匈奴小入佯北不勝以數千人委之單

于聞之大率衆來入李牧多為奇陣張左右翼擊之

大破殺匈奴十餘萬騎滅襜褕破東胡降林胡單于

奔走其後十餘歲匈奴不敢近趙邊城

史李牧傳

趙間魏

將以求親于秦子順謂趙王曰

趙悼襄王

此君之下吏計

過也比目之魚所以不見得于人者以偶視而俱走也今秦有兼吞天下之志日夜間伺不忘于側息也趙魏與之隣接而强弱不敵秦所以不敢圖并趙魏者徒以二國并目周旋者也今無故自離以資强秦天下拙謀無過此者故臣曰君之下吏計過也夫連雞不能上捷亦猶二國構難不能自免于秦也願王熟慮之趙王曰敬受教

孔叢
子中

史記 自晉悼公使魏絳和戎翟戎翟朝晉後百

有餘年趙襄子喻句注而破并代以臨胡貉其後既與韓魏共滅智伯分晉地而有之則趙有代句注之北魏有西河上郡以與戎界邊其後義渠之戎築城郭以自守而秦稍蠶食至于惠王遂拔義渠二十五城惠王擊魏魏盡入西河及上郡于秦秦昭王時義渠戎王與宣太后亂有二子宣太后詐而殺義渠戎王于甘泉遂起兵伐殘義渠于是秦有隴西北地上郡築長城以拒胡而趙武靈王亦變俗胡服習騎射

北破林胡樓煩築長城自代并陰山下高闕為塞而
置雲中雁門代郡其後燕有賢將秦開為質於胡胡
甚信之歸而嚴破走東胡東胡却千餘里與荆軻刺
秦王秦舞陽者開之孫也燕亦築長城自造陽至襄
平置上谷漁陽右北平遼西遼東郡以拒胡當是之時
冠帶戰國七而三國邊于匈奴其後趙將李牧時匈
奴不敢入趙邊

魏王使相國修好鄰國遂連和于趙趙王既賓之而燕

問子順曰今寡人欲來北狄不知其所以然答曰誘之以其所利而與之通市則自至矣王曰寡人欲因而弱之若與交市分我國貨散于夷狄是強之也可乎答曰夫與之市者將以我無用之貨取其有用之物是固所以弱之術也王曰何謂我之無用彼之有用答曰衣服之物則有珠玉五采飲食之物則有酒醪五熟五味也此即我之所有而彼之所利者也夷狄之貨唯牛馬旃裘弓矢之器是其所饒而輕以與人者也以吾所有易彼

所饒如斯不已則夷狄之用將縻於衣食矣殆可舉樞

而驅之豈徒弱之而已乎趙王曰敬受教

孔叢子中

邯鄲之民以正月之旦獻雀于趙王而綴之以五絲

亦絲

作采

趙王大悅申叔以告子順曰王何以為也對曰正旦

放之示有生也子順曰此委巷之鄙事爾非先王之法

也且又不令申叔曰敢問何謂不令答曰夫雀者取其

名焉則宜受之于上不宜取之于下下人非所得制爵

也而王悅此殆非吉祥矣昔虢公祈神神賜之土田是

失國而更受田之祥也今以一國之王受民之雀將何

悅哉

孔叢子中

卓襄王問龐煖曰夫君人者亦有為其國乎

卓當作悼此趙悼襄

王也孝成王之子悼襄王三年龐煖將攻燕擒其將劇辛

龐煖曰王獨不聞俞跗之

為醫乎已成必治鬼神避之

傳云上古之時醫有俞跗治病不以湯液醪灑鏡石

橋引索機毒熨而割皮解肌訣脉結筋搦髓腦浣腸胃練精易形此雖已成所以必治而鬼神避之

楚王

臨朝為隨兵故若堯之任人也不用親戚而必使能其

治病也不任所愛必使舊醫

語曰老醫善卜盖老醫更病多矣堯故使之

楚

王聞傳募誠在身

誠蓋病也

必待俞跗

俞跗蓋非楚人也亦寓言

卓襄王

曰善龐煖曰王其忘乎昔伊尹醫殷太公醫周武王百

里醫秦申庶醫郢原季醫晉范蠡醫越管仲醫齊而五

國霸其善一也然道不同數卓襄王曰願聞其數煖曰

王獨不聞魏文侯之問扁鵲耶

扁鵲鄭人姓秦氏名越人

曰子昆弟

三人其孰最善為醫扁鵲曰長兄最善中兄次之扁鵲

最為下魏文侯曰可得聞耶扁鵲曰長兄于病視神未

有形而除之故名不出于家中兄治病其在毫毛故名

下出于閭若扁鵲者鑱血脉投毒藥副肌膚間而名出聞于諸侯魏文侯曰善使管子行醫術以扁鵲之道曰桓公幾能成其霸乎凡此者不病病治之無名使之無

形至功之成其

其一作六

下謂之自然故良醫化之拙醫敗

之雖幸不死創伸肢維

維幸也

卓襄王曰善寡人雖不能

無創孰能加秋毫寡人之上哉

鵬冠子世賢

秦召春平君因而留之泄鈞為之謂文信侯曰春平君者趙王甚愛之而郎中妬之故相與謀曰春平君入秦

秦必留之故相與謀而內之秦也今君留之是絕趙而

郎中之計中也君不如遣春平君而留平都

國策作平都侯

春

平君言行信于王王必厚割趙而贖平都文信侯曰善

因遣之

年表云太子從質秦歸按太子即春平君也

城韓臯

三年龐煖將攻燕禽其將劇辛

四年龐煖將趙楚魏燕之銳師攻秦藪不拔移攻齊取

饒安

五年傅抵將居平邑

傅抵趙將姓名

慶舍將東陽河外師守

河梁

六年封長安君以饒 魏與趙鄴

九年趙攻燕取豸陽城豸當作漁兵未罷秦攻鄴拔之 悼

襄王卒子幽繆王遷立世本王遷無謚此獨稱幽繆者蓋秦滅趙之後代王嘉謚之也

幽繆王

幽繆王遷元年城柏人

二年秦攻武城年表云秦拔我平陽扈輒率師救之軍敗死焉

三年秦攻赤麗宜安李牧率師與戰肥下却之封牧為

武安君

史李牧傳

秦破趙殺將扈輒于武遂城斬首十萬趙乃

以李牧為大將軍擊秦軍於宜安大破秦軍走秦將

桓齮封李牧為武安君

四年秦攻番吾李牧與之戰却之

李牧傳云擊破秦軍南距韓魏

五年代地大動自樂徐以西北至平陰臺屋墻垣大半

壞地圯東西百三十步

六年大飢民訛言曰趙為號秦為策以為不信視地之

生毛

七年秦人攻趙趙大將李牧將軍司馬尚將擊之李牧
誅司馬尚免趙忽及齊將顏聚代之忽當作蔥趙忽軍破顏
聚亡去以王遷降

八年邯鄲為秦

史李牧傳

趙王遷七年秦使王翦攻趙趙使李牧司馬

尚禦之秦多與趙王寵臣郭開金為反間言李牧司
馬尚欲反趙王乃使趙蔥及齊將顏聚代李牧李牧

不受命趙使人微捕得李牧斬之廢司馬尚後三月王翦因急擊趙大破殺趙蔥虜王遷及其將顏聚遂

滅趙

史

趙世家

太史公曰吾聞馮王孫曰趙王遷其母娼也

嬖于悼襄王悼襄王廢適子嘉而立遷遷素無行信
讒故誅其良將李牧用郭開豈不謬哉秦既虜遷趙
之亡大夫共立嘉為王王代六歲秦進兵破嘉遂滅
趙以為郡

列女傳 趙悼襄王后娼婦也以其美而取之李牧
諫曰不可女之不正國之所以覆而不安也此女亂
一宗大王不畏乎王曰亂在寡人為政遂取之初王
后生子嘉為太子娼后既入生子遷陰譖后及太子
于王使人犯太子而陷之于罪王遂廢嘉而立遷黜
后而立娼姬為后及王薨遷立娼后淫佚不止通于
春平君多受秦賂而使王誅李牧其後秦兵徑入莫
能拒遂見虜于秦趙亡大夫怨娼后之譖太子及李

牧乃殺娼后而滅其家共立嘉于代

淮南子 趙王遷流于房陵思故鄉則為作山水之
謳聞之者莫不隕涕

括地志 趙王遷墓在房州房陵縣西九里

地志 湖廣 秦使王翦滅趙徙王于房陵王懷鄉作歌聞

者流涕今鄖陽府房縣有趙王冢

雜錄

路說謂周頗曰公不愛趙天下必從周頗曰固欲天下

之從也天下從則秦利也路說應之曰然則公欲秦之利夫周頗曰欲之路說曰公既欲之則胡不為從矣

呂覽

應言

王子於期為趙簡主取道爭千里之表其始發也羸伏溝中王子於期齊轡策而進羸突出于溝中馬驚駕敗一旦王子於期為宋君為千里之逐已駕察手吻文且發矣驅而前之輪中繩引而却之馬掩迹拊而發之羸出于竇中馬退而却策不能進前也馬駢而走轡不能

正也

韓子外
儲右

扁鵲過趙趙王太子暴疾而死鵲造宮門曰吾聞國中
卒有壤土之事得無有急乎中庶子之好方者應之曰
然王太子暴疾而死扁鵲曰入言鄭鑿秦越人能活太
子中庶子難之曰吾聞上古之為鑿者曰苗父苗父之
為鑿也以營為席以芻為狗北面而祝發十言耳請扶
而來者舉而來者皆平復如故子之方能如此乎扁鵲
曰不能又曰吾聞中古之為鑿者曰俞跗俞跗之為鑿

也搦腦髓束育膜炊灼九竅而定經絡死人復為生人故曰俞跗子之方能若是乎扁鵲曰不能中庶子曰子之方如此譬若以管窺天以錐刺地所窺者甚大所見者甚少鈞若子之方豈足以變駭童子哉扁鵲曰不然物故有味掃而中蛟頭掩目而別白黑者太子之疾所謂尸厥者也以為不然入診之太子股陰當濕耳中焦焦如有嘯聲然者皆可治也中庶子入報趙王趙王跣而趨出門曰先生遠辱幸臨寡人先生幸而有之則糞土

之息得蒙天履地而長為人矣先生不有之則先犬馬
填溝壑矣言未已涕泣沾襟扁鵲遂為診之先造軒光
之灶八成之湯砥針礪石取三陽五輸子容搏藥子明
吹耳陽儀反神子越扶形子游矯摩太子遂得復生天
下聞之皆曰扁鵲能生死人鵲辭曰子非能生死人也
特死夫當生者活耳夫死者猶不可藥而生也悲夫亂
君之不治不可藥而息也

說苑辨物 韓詩作號世
子叙致各異不妨並存

趙王遊于圃中左右以菟與虎而輟觀之眈然環其眼

環轉其眼以作怒也

王曰可惡哉虎目也左右曰平陽君之目可

惡過此見此未有害也見平陽君之目如此者則必死

矣明日平陽君聞之使人殺言者而王不加誅也

韓子外儲

右

趙急求李歟李言續經與之俱如衛抵公孫與公孫與

見而與入續經因告衛吏使捕之

捕李歟也

續經以此仕趙

五大夫莫與同朝子孫不可以交友

賤續經之行也呂覽無義

鄴令襄疵陰善趙王左右趙王謀襲鄴襄疵輒聞而先

言之魏王魏王倘之趙乃輒還

韓子內儲下

邯鄲師有出新曲者託之李奇

古之名倡

諸人皆爭學之後

知其非也而皆棄其曲此未始知音者也鄙人有得玉

璞者喜其狀以為寶而藏之以示人人以為石也因而

棄之此未始知玉者也

淮南子修務

趙王使人于楚鼓瑟而遣之曰慎無失吾言使者受命
伏而不起曰大王鼓瑟未嘗若今日之悲也王曰調使
者曰調則可記其柱王曰不可天有燥濕絃有緩急柱

有推移不可記也使者曰請借此以喻楚之去趙也千有餘里亦有吉凶之變凶則弔之吉則賀之猶柱之有推移不可記也故王之使人必慎其所之而不任以辭詩曰征夫捷捷每懷靡及蓋傷自上而御下也

韓詩卷七此

不知何時或漢初事

說苑

奉使


趙王遣使者之楚方鼓瑟而遣之誠之曰

必如吾言使者曰王之鼓瑟未嘗悲若此也王曰宮商固方調矣使者曰調則何不書其柱耶王曰天有

燥濕絃有緩急官商移徙不可知是以不書使者曰
明君之使人也任之以事不制以辭遭吉則賀之凶
則弔之今楚趙相去千有餘里凶吉憂患不可豫知

猶柱之不可書也

又韓詩外
傳語少別



春秋戰國異辭卷五十一

欽定四庫全書

史部

春秋戰國異辭卷五十二

詳校官編修_臣曹錫齡

編修_臣裴謙履勛

總校官無吉士_臣倉聖脈

校對官中書_臣李斯咏

謄錄監生_臣王鍾岱

欽定四庫全書

春秋戰國異辭卷五十二

右春坊右諭德陳厚耀撰

越

吳越春秋禹周行天下還歸大越登茅山以朝四方羣臣封有功爵有德崩而葬焉至于少康恐禹跡宗廟祭祀之絕乃封其庶子於越號曰無餘

越絕

記云無餘都會稽山南故越城是也

史越世家越王其先禹之苗裔而夏后帝少康之庶子也封于會稽以奉禹之祀文身斷髮披草萊而邑焉後二十餘世至于允常允常之時與吳王闔廬戰而相怨伐

允常

越王允常聘區冶子作名劍五枚一曰純鉤二曰湛盧

三曰豪曹

或曰盤郢

四曰魚腸五曰巨闕秦客薛燭善相劍

一作句踐時事

王取純鉤示之薛燭矍然望之曰沈沈如芙蓉

始生于湖觀其文如列星之行觀其光如水之溢塘觀其色煥煥如水將釋見日之光王曰客有賣此劍者有市之鄉三十駿馬千匹千戶之都二其可與乎薛燭曰不可臣聞王之造此劍赤堇之山破而出錫若耶之溪涸而出銅吉日良時雨師灑道雷公發鼓蛟龍捧爐天帝裝炭太一下觀于是區冶子因天地之精造為此劍取湛盧示之薛燭曰善哉銜金鐵之英行氣託靈服此劍者可以折衝伐敵人君有逆謀則去之

自泰客薛燭以下至此或

載入闔閭下此下類函允常以魚腸湛盧豪曹獻吳
所引與今吳越春秋小異

王僚後闔閭為一女殺生以送死湛盧之劍惡其無道

乃去如楚昭王寐而得之召風胡子問之此劍值幾何

對曰赤堇之山已合若耶之谿深而不測羣神上天區

冶子已死雖有傾城量金珠玉猶不可與況駿馬萬戶

之都乎吳越春秋

吳越春秋 越王允常聘歐冶子作劍五枚地志浙江歐冶

子吳闔閭大夫之子三大二小三曰豪曹秦客薛燭善相劍王

取豪曹示之薛燭曰非寶劍也今豪曹五色黯然無
華已殞其光亡其神此劍不登斬而辱則墮于飲中
矣王曰寡人置劍竹廬上過而墜之斷金獸之頸飲
濡其刃以為利也

劍

地志浙江處州府龍泉縣有劍池湖相傳歐冶子鑄劍于此號龍淵

允常卒子句踐立

句踐上

句踐元年吳王闔廬聞允常死乃興師伐越越王句踐

使死士挑戰三行至吳陳呼而自剄吳師觀之越因襲擊吳師吳師敗于槁李射傷吳王闔廬闔廬且死告其子夫差曰必毋忘越三年勾踐聞吳王夫差日夜勒兵且以報越越欲先吳未發往伐之范蠡諫曰不可臣聞兵者凶器也戰者逆德也爭者事之末也陰謀逆德好用凶器試身於所未上帝禁之行者不利越王曰吾已決之矣遂興師吳王聞之悉發精兵擊越敗之夫椒越王乃以餘兵五千人保棲于會稽吳王追而圍之越王

謂范蠡曰以不聽子故至於此為之奈何蠡對曰持滿者與天定傾者與人節事者以地卑辭厚禮以遺之不許而身與之市句踐曰諾乃令大夫種行成于吳膝行頓首曰君王亡臣句踐使陪臣種敢告下執事句踐請為臣妻為妾吳王將許之子胥言于吳王曰天以越賜吳勿許也種還以報句踐句踐欲殺妻子燔寶器觸戰以死種止句踐曰夫吳太宰嚭貪可誘以利請間行言之於是句踐乃以美女寶器令種間獻吳太宰嚭嚭受

乃見大夫種于吳王種頓首言曰願大王赦句踐之罪
盡入其寶器不幸不赦句踐將盡殺其妻子燔其寶器
五千人觸戰必有當也詒因說吳王曰越已服為臣若
將赦之此國之利也吳王將許之子胥進諫曰今不滅
越後必悔之句踐賢君種蠡良臣若反國將為亂吳王
弗聽卒赦越罷兵而歸

史越世家

越絕書

紀策

范蠡始居楚生于宛橐或伍戶之虛其

為結僮之時一癡一醒時人盡以為狂然獨有聖賢

之明人莫可與語內視若盲反聽若聾大夫種入其縣知有賢者未覩所在求邑中不得其邑人以為狂夫多賢士衆賤有君子汎求之焉得蠡而悅乃從官屬問治術蠡修衣冠有頃而出進揖讓君子之容終日而語陳霸王之道志合意同捐其官位相要而往止于吳二人以為子胥在無所聞其辭種曰今將安之蠡曰彼為我何邦不可乎去吳之越句踐賢之種躬正內蠡出治外臣主同心遂霸越邦

越絕書

內傳

句踐欲伐吳闔廬范蠡諫曰不可臣聞
之天貴持盈持盈者言不失陰陽日月星辰之綱紀
地貴定傾定傾者言地之長生丘陵平均無不得宜
人貴節事節事者言王者以下公卿大夫當調陰陽
和順天下事來應之物來知之天下莫不盡其忠信
從其政教謂之節事節事者至事之要也天道盈而不溢
盛而不驕言天生萬物以養天下蠅飛蠕動各得其
性春生夏長秋收冬藏不失其常故曰天道盈而不

溢盛而不驕者也地道施而不德勞而不矜其功言
地生長五穀持養萬物功盈德博是所謂施而不德
勞而不矜其功者也人道不逆四時言王者以下至
于庶人皆當和陰陽四時之變順之者有福逆之者
有殃故曰人道不逆四時之謂也因懣視動者言存
亡吉凶之應善惡之叙必有漸也天道未作不先為
客言客者去其國入人國也地兆未發不先動衆言
非春夏之時不可以種五穀國家不見必亡之失不

可伐也

越絕書

范伯

范蠡始居楚曰范伯自謂衰賤未嘗世

祿故自菲薄食則甘天下之無味居則安天下之賤
位復被髮佯狂不與于世謂大夫種曰三王則三皇
之苗裔也五伯乃五帝之末世也天運歷紀千歲一
至黃帝之元執辰破已霸王之氣見于地戶于是要
大夫種入吳此時馮同相與共戒之伍子胥在自與
不能闕其辭蠡曰吳越二邦同氣民俗地戶之位非

吳則越乃入越越王常與言盡日大夫石買居國有
權辯口進曰銜女不貞銜士不信和氏之璧求者不
爭賈騏驎之材不難險阻之路客歷諸侯無所售無
因自致殆非真賢惟大王察之于是范蠡退而不言
遊于楚越之間大夫種進曰昔者市偷自銜于晉晉
用之而勝楚伊尹負鼎入殷遂佐湯取天下有智之
士不在遠近取也謂之帝王求備者亡易曰有高世
之材必有負俗之累有至智之明者必破庶衆之議

成大功者不拘于俗論大道者不合于衆唯大王察之王曰石買知往而不知來其使寡人棄賢後遂師

二人竟以禽吳

石買益疎其後使將兵于外遂為軍士所殺

列仙傳 范蠡字少伯徐人也事周師太公望好服桂飲水為越大夫破吳後乘輕舟入海變名適齊為鴟夷子更後百餘年見于陶為陶朱君財累億萬復棄之蘭陵賣藥後人世世識見之云

新論

知人

范蠡吠于犬竇文種聞而拜之

史記正義

會稽錄

范蠡字少伯越之上將軍也本楚宛

三戶人佯狂個儻負俗文種為宛令遣吏謁奉更還
曰范蠡本國狂人生有此病種笑曰吾聞士有賢俊
之姿必有佯狂之譏內懷獨見之明外有不智之毀
此固非二三子之所知也駕車而往蠡避之後知種
之必來謁謂兄嫂曰今日有客願假衣冠有頃種至
抵掌而談旁人觀者聳聽之矣

吳越春秋 文種字子禽荆平王時為宛令之三戶

之里范蠡從犬竇蹲而吠之從吏恐文種慙令人引衣而障之文種曰無障也吾聞犬之所吠者人今吾到此有聖人之氣行而求之來至於此且人身而犬吠者謂我是人也乃下車拜蠡不為禮 今本無

吳越春秋 文種楚平王時為宛令不治官職有若

狂也

地志文種字子禽浙江鄞縣人

句踐之困於會稽也喟然嘆曰吾終于此乎種曰湯繫夏臺文王囚羑里晉重耳奔翟齊小白奔莒其卒王霸

由此觀之何遽不為福乎吳既赦越越王句踐反國乃
苦身焦思置膽於坐坐卧即仰膽飲食亦嘗膽也曰女
忘會稽之恥耶身自耕作夫人自織食不加肉衣不重
采折節下賢人厚遇賓客振貧弔死與百姓同其勞欲
使范蠡治國政蠡對曰兵甲之事種不如蠡鎮撫國家
親附百姓蠡不如種於是舉國政屬大夫種而使范蠡
與大夫柘稽行成為質於吳二歲而吳歸蠡

史越世家

越絕書

德序

句踐困于會稽嘆曰我其不伯乎欲殺

妻子角戰以死。蟲對曰：「殆哉！王失計也。愛其所惡，且吳王賢，不離不肖，不去若，早辭以地，讓之天，若棄彼，彼必許。」句踐曉焉，曰：「豈然哉？」遂聽之。

新書 夫差即位，乃與越人戰江上。棲之會稽，越王之窮，至乎吃山草，飲腑水，易子而食。於是履甕，戴壁，號咷告母罪，呼皇天，使大夫種行成於吳王。吳王將許，子胥曰：「不可。越國之俗，勤勞而不愠，好亂勝而無禮，谿傲而輕絕，俗好詛而倍盟。放此類者，鳥獸之儕。」

徒狐狸之醜類也生之為患殺之無咎請無與成大
夫種拊心嗷啼沫泣而言信割白馬而為犧指九天
而為證請婦人妾丈夫為臣百世名寶因閒官為積
孤身為關內諸侯世為忠臣吳王不忍結師與成
越絕書 會稽山土城者句踐與吳戰大敗棲其中
因以下為目魚池其利不租

吳越春秋 越王既棲會稽范蠡等曰臣竊見會稽
之山有魚池上下二處水中有三江四瀆之流九谿

六谷之廣上池宜于君王下池宜于臣民畜魚三年其利可以致千萬越國當富盈

地志

紹興府

句東山在諸暨縣句踐所都 闔閭侵越

句踐退保于城山

在蕭山縣

山顛有泉產嘉魚吳王意其

乏水餽以米鹽句踐取雙鯉報之吳兵夜遁

句踐入官於吳身執干戈為吳王洗馬

韓子

越絕書

記地

句踐入官于吳夫人從道產女于亭養

子李鄉句踐勝吳更名亭為女陽亭更李鄉為語兒

鄉

吳越春秋 越王句踐五年五月與大夫文種范蠡

入臣于吳羣臣皆送至浙江之上臨水祖道軍陣固

陵文種前為祝詞曰皇天祐助前沈後揚禍為德根

憂為福堂威人者滅服從者昌王雖雖一作離牽致其後

無殃君臣生離感動上皇衆夫哀悲莫不感傷臣請

薦薦一作薄脯行酒三觴越王仰天太息舉杯垂涕默無

所言種復前祝曰大王德壽無疆無極乾坤受靈神

祇輔翼我王厚之祉祐在側德銷百殃利受其福去
彼吳庭來歸越國觴酒既升請稱萬歲越王曰孤承
前王餘德守國于邊幸蒙諸大夫之謀遂保前王邱
墓今遭辱恥為天下笑將孤之罪耶諸大夫之責也
大夫扶同曰扶史作逢何言之鄙也昔湯繫于夏臺伊尹
不離其側文王囚于石室太公不棄其國興衰在天
存亡繫于人湯改儀而媚于桀文王服從而幸于紂
夏殷恃力而虐二聖兩君屈已以得天道故湯王不

以窮自傷周文不以因為病越王曰昔堯任舜禹而天下治雖有洪水之害不為人災變異不及于民況于人君乎大夫苦成曰不如君王之言天有歷數德有厚薄黃帝不讓堯傳天子三王臣弑其君五霸子弑其父德有廣狹氣有高下今之世猶人之市置貨以設詐抱謀以待敵不幸陷厄求伸而已大王不覽于斯而懷喜怒越王曰任人者不辱身自用者危其國大夫皆前圖未然之端傾敵破仇坐招泰山之福

今寡人守窮若斯而云湯文困厄後必霸何言之違
禮乎夫君子爭寸陰而棄珠玉今寡人冀得免于軍
旅之憂而復反係於敵人之手身為傭隸妻為僕妾
往而不返客死敵國若魂魄有知愧於前君其無知
體骨棄捐何大夫之言不合於寡人於是大夫種范
蠡曰古人曰居不幽志不廣形不愁思不遠聖王賢
主皆遇困厄之難蒙不赦之恥身居而名尊軀辱而
聲榮處卑而不以為惡居危而不以為薄五帝德厚

無窮厄之恨然尚有泛濫之憂

此下疑有闕文

三守暴困之

辱不離三獄之困涕泣而受寃行哭而為隸演易作卦天道祐之時過於期否終則泰諸侯並救王命見符朱鬣玄豹輔臣結髮折獄破械反國修德遂討其仇擢假海內若覆手背天下宗之功垂萬世大王屈厄臣誠盡謀夫截骨之劒無削剝之利白鐵之矛無分髮之便建策之士無暴興之說今臣遂天文案隆籍二氣共萌存亡異處彼興則我辱我霸則彼亡二

國爭道未知所就君王之厄天道之數何必自傷哉

夫吉者凶之門福者禍之根今大王雖在危困之際

孰知其非暢達之兆哉大夫計

越絕作計倪史作計然裴駟按范子

曰計然者葵丘濮上人姓辛氏字文子其先晉國亡公子也南游於楚范蠡師事之

曰今君王

國於會稽窮入於吳言悲辭苦羣臣泣之雖則恨悵

之心莫不感動而君王何為謾辭譁說用而相欺臣

誠不取越王曰寡人將去入吳以國累諸侯大夫願

各自述吾將屬焉大夫臯如曰臣聞大夫種忠而善

慮民親其知士樂為用今委國一人其道必守何順

心佛命羣臣

佛大也

大夫曳庸曰

左傳作后庸國語作舌庸

大夫文

種者國之梁棟君之爪牙夫驥不可與匹馳日月不可並照君王委國於種則萬綱千紀無不舉者越王曰夫國者前王之國孤力弱勢劣不能遵守大夫客官於吳委國歸民以付二三子吾之由也亦子之憂也君臣同道父子同氣天性自然豈得以在者盡忠亡者為不信乎何諸大夫論事一合一離令孤心不

定也夫推國任賢度功績成者君之命也奉教順理不失分者臣之職也吾願諸大夫以其所能而云委質而已於乎悲哉計硯曰君王所陳者固其理也昔湯入夏委國於文祀西伯之殷委國於一老今懷憂將滯志在於還夫適市之妻教嗣冀除出亡之君勅臣守禦子問以事臣謀以能今君王欲士之所志各陳其情舉其能者議其宜也越王曰大夫之論是也吾將逝矣願聞諸君之風大夫種曰夫內修封疆之

役外修耕戰之備荒無遺土百姓親附臣之事也大
夫范蠡曰輔危主存亡國不恥屈厄之難安守被辱
之地往而必反與君復仇臣之事也大夫苦成曰
發君之令明君之德窮與俱厄進與俱霸統煩理亂
使民知分臣之事也大夫曳庸曰奉令受使結和諸
侯通命達旨賂往遺來解憂釋患使無所疑出不忘
命入不被尤臣之事也大夫皓進曰一心齊志上與
等之下不違令動從君命修德履義守信溫故臨非

決疑君誤臣諫直心不撓舉過列平不阿親戚不私
於外推身致君終始一分臣之事也大夫諸稽郢曰
望敵設陣飛矢揚兵履腹涉尸血流滂滂貪進不退
二師相當破敵攻衆威凌百邦臣之事也大夫臯如
曰修德行惠撫慰百姓身臨憂勞動輒躬親弔死存
疾救活民命蓄陳儲新食不二味國富民實為君養
器臣之事也大夫計硯曰候天察地紀歷陰陽觀變
參災分別妖祥日月含色五精錯行福見知吉妖出

知凶臣之事也越王曰孤雖入於北國為吳窮虜有
諸大夫懷德抱術各守一分以保社稷孤何憂焉遂
別於浙江之上羣臣垂泣莫不咸哀越王仰天嘆曰
死者人之所畏若孤之聞死其於心胸曾無怵惕遂
登船徑去終不返顧越王夫人乃據船哭顧烏鵲啄
江渚之蝦飛去復來因哭而歌之曰仰飛鳥兮烏鵲
凌玄虛兮翩翩集洲渚兮優恣啄蝦矯翮兮雲間任
厥性兮往還妾無罪兮負地有何辜兮譴天颿颿獨

兮西往孰知返兮何年心惛惛兮若割淚泣泣兮雙
懸又哀吟曰彼飛鳥兮鳶鳥已迴翔兮翕蘇心在專
兮素蝦何居食兮江湖徊復翔兮游颺去復返兮於
乎始事君兮去家終我命兮君都終來遇兮何辜離
我國兮去吳妻衣褐兮為婢夫去冕兮為奴歲遥遥
兮難極冤悲痛兮心惻腸千結兮服膺於乎哀哉忘
食願我身兮如鳥身翔翔兮矯翼去我國兮心搖情
憤惋兮誰識越王聞夫人怨歌心慟乃曰孤何憂吾

之六翮備矣於是入吳見夫差稽首再拜稱臣曰東
海賤臣句踐上愧皇天下負后土不裁功力污辱王
之軍士抵罪邊境大王赦其深辜裁加役臣使執箕
帚誠蒙厚恩得保須臾之命不勝仰感俯愧臣句踐
叩頭頓首吳王夫差曰寡人於子亦過矣子不念先
君之仇乎越王曰臣死則死矣惟大王原之伍胥在
旁目若燦火聲如雷霆乃進曰飛鳥在青雲之上尚
欲繳微矢以射之豈況近卧於華池集於庭廡乎今

越王放於南山之中游於不可存之地幸來涉我壤
土入吾桎梏此乃厨宰之食也豈可失之乎吳王曰
吾聞誅降殺服禍及三世吾非愛越而不殺也畏皇
天之咎教而赦之太宰嚭諫曰子胥明於一時之計
不通安國之道願大王遂其所執無拘羣小之口夫
差遂不誅越王令駕車養馬秘於宮室之中三月吳
王召越王入見越王伏於前范蠡立於後吳王問范
蠡曰寡人聞貞婦不嫁破亡之家仁賢不官絕滅之

國今越王無道國已將亡社稷壞崩身死世絕為天下笑而子及主俱為奴僕來歸於吳豈不鄙乎吾欲赦子之罪子能改心自新棄越歸吳乎范蠡對曰臣聞亡國之臣不敢語政敗軍之將不敢語勇臣在越不忠不信令越王不奉大王命號用兵與大王相持至令獲罪君臣俱降蒙大王鴻恩得君臣相保願得入備掃除出給趨走臣之願也越王伏地流涕自謂遂失范蠡吳王知范蠡不可臣謂曰子既不移其志

吾復置子於石室之中范蠡曰臣請如命吳王起入
宮中越王范蠡趨入石室越王服犢鼻著樵頭夫人
衣無緣之裳施左闕之襦夫斫養馬妻給水除糞
灑掃三年不愠怒面無恨色吳王登高遠望見越王
及夫人范蠡坐於馬糞之旁君臣之禮存夫婦之儀
具王顧謂太宰嚭曰彼越王者一節之人范蠡一介
之士雖在窮厄之地不失君臣之禮寡人傷之太宰
嚭曰願大王以聖人之心哀窮孤之士吳王曰為子

赦之後三月乃擇吉日而欲赦之召太宰嚭謀曰越之與吳同土連域勾踐愚黠親欲為賊寡人承天之神靈前王之遺德誅討越寇囚之石室寡人心不忍見而欲赦之於子奈何太宰嚭曰臣聞無德不復大王垂仁恩加越越豈敢不報哉願大王卒意越王聞之召范蠡告之曰孤聞於外心獨喜之又恐其不卒也范蠡曰大王安心事將有意在玉門第一今年十二月戊寅之日時加日出戊囚日也寅陰後之辰也

合庚辰歲後會也夫以戊寅日聞喜不以其罪罰日也時加卯而賊戊功曹為騰蛇而臨戊謀利事在青龍青龍在勝光而臨酉死氣也而尅寅是時尅其日用又助之所求之事上下有憂此豈非天網四張萬物盡傷者乎王何喜焉子胥果諫吳王曰昔桀囚湯而不誅紂囚文王而不殺天道還反福轉成禍故夏為湯所誅殷為周所滅今大王既囚越君而不行誅臣謂大王惑之深也得無夏殷之患乎吳王召越王

久之不見范蠡文種憂而占之曰吾王見擒也有頃
太宰嚭出見大夫種范蠡而言越王復拘於石室伍
子胥復諫吳王曰臣聞王者攻敵克之則加以誅故
後無報復之憂遂免子孫之患今越王已入石室宜
早圖之後必為吳之患太宰嚭曰昔者齊桓割燕所
至之地以貺燕公而齊君獲其美名宋襄濟河而戰
春秋以多其義功立而名稱軍敗而德存今大王誠
赦越王則功冠於五霸名越於前古吳王曰待吾疾

愈赦之後一月越王坐石室召范蠡曰吳王疾三月
不愈吾聞人臣之道主疾臣憂且吳王遇孤恩甚厚
矣疾之無瘳惟公卜焉范蠡曰吳王不死明矣到已
已日當瘳惟大王留意越王曰孤所以窮而不死者
賴公之策耳中復猶豫豈孤之志哉可與不可惟公
圖之范蠡曰臣竊見吳王真非人也數言成湯之義
而不行願大王請問疾得見因求其蠹而嘗之觀其
顏色當拜賀焉言其不死以瘳起日期之既言信後

則大王何憂越王明日謂太宰嚭曰囚臣欲一見問
疾太宰嚭入言于吳王王召而見之適遇吳王之便
太宰嚭奉溲惡以出逢戶中越王因拜請嘗大王之
溲以決吉凶即以手取其便與惡而嘗之因入曰囚
臣句踐賀於大王王之疾已巳日有瘳至三月壬申
病愈吳王曰何以知之越王曰下臣嘗事師聞糞者
順穀味逆時氣者死順時氣者生今日臣嘗大王之
糞其味苦且楚酸是味也應春夏之氣臣以是知之

吳王太悅曰仁人也乃赦越王得離其石室去就宮
室執牧養之事如故越王從嘗糞惡之後遂病口臭
范蠡乃令左右皆食岑草以亂其氣其後吳王如期
日疾愈心念其忠臨政之後大縱酒於文臺吳王出
令曰今日為越王陳北面之坐羣臣以客禮事之伍
子胥趨出不御坐酒酣太宰嚭曰異乎今日坐者不
仁者逃仁者留臣聞同聲相和同心相求今國相剛
勇之人意者內慙至仁之存也而不御坐乎吳王曰

然於是范蠡與越王俱起為吳王壽其辭曰下臣句
踐從小臣范蠡奉觴上千歲之壽辭曰皇在上令昭
下四時并心察慈仁者大王躬親鴻恩立義行仁九
德四塞威服羣臣於乎休哉傳德無極上感太陽降
瑞翼翼大王延壽萬歲長保吳國四海咸承諸侯賓
服觴酒既升永受萬福於是吳王大悅明日伍子胥
入諫曰昨日大王何見乎臣聞內懷虎狼之心外執
美詞之說但為外情以存其身豺不可謂廉狼不可

謂親今大王好聽須臾之說不慮萬歲之患放棄忠直之言聽用讒夫之語不滅澀血之仇不絕懷毒之怨猶縱毛爐炭之上幸其不焦投卵于鈞之下望其必全豈不殆哉臣聞桀登高自知危然不知所以自安也前據白刃自知死而不知所以自存也惑者知返迷道不遠願大王察之吳王曰寡人有疾三月不聞相國一言是相國之不慈也又不進口之所嗜心不相思是相國之不仁也夫為人臣不仁不慈焉得知

其忠信者乎越王迷惑棄守邊之事親將其臣民來
歸寡人是其義也躬親為虜不愠寡人寡人有疾親
嘗寡人之溲是其慈也虛其府庫盡其寶幣不念舊
故是其忠信也三者既立以養寡人寡人聽相國而
誅之是寡人之不智也而為相國快意耶豈不負皇
天乎子胥曰何大王之言反也夫虎之卑勢將以有
擊也狸之卑身將求所取也雉以眩移拘於網魚以
有悅死於餌且大王初臨政負玉門之第九誠事之

敗無咎矣今年三月甲戌時加鷄鳴甲戌歲位之會
將也青龍在酉德在土刑在金是日賊其德也知父
將有不順之子君有逆節之臣大王以越王歸吳為
義以飲溲食惡為慈以虛府庫為仁是故為無憂於
人其不可親面聽貌觀以存其身今越王入臣於吳
是其謀深也虛其府庫不見恨色是欺我王也下飲
王之溲者是上食王之心也下嘗王之惡者是上食
王之肝也大哉越王之崇吳吳將為所擒也惟大王

留意察之臣不敢逃死以負前王一旦社稷丘墟宗廟荆棘其悔可追乎吳王曰相國置之勿復言矣寡人不忍復聞於是遂赦越王歸國送於蛇門之外羣臣祖道吳王曰寡人赦君使其返國必念終始王其勉之越王稽首曰今大王哀臣孤窮使得生全還國與種蠱之徒願死於轂下上天蒼蒼臣不敢負吳王曰於乎吾聞君子一言不再今已行矣王勉之越王再拜跪伏吳王乃引越王登車范蠡執御遂去至三

津之上仰天嘆曰嗟乎孤之危屯誰念復生渡此津也謂范蠡曰今三月甲辰時加日昃孤蒙上天之命還歸故鄉得無後患乎范蠡曰大王勿疑直眊道行越將有福吳當有憂至浙江之上望見大越山川重秀天地再清王與夫人嘆曰吾已絕望永辭萬民豈料再還重復鄉國言竟掩面涕泣闌干此時萬民咸歡羣臣畢賀

盛弘之荊州記興安縣水邊有平石其上有一具俗云越王渡溪

脫履墮櫛於此

吳越春秋 越王句踐臣吳至歸越句踐七年也百姓拜之於道曰君王苦矣今受天之福復於越國霸王之迹自斯而起王曰寡人不慎天教無德於民今勞萬姓擁於歧路將何德化以報國人顧謂范蠡曰今十有二月己巳之日時加禺中孤欲以此到國何如蠡曰大王且留以臣卜日於是范蠡進曰異哉大王之擇日也王當疾趨車馳人走越王策馬飛輿遂復宮闕吳封地百里於越東至炭瀆西至周宗南造

於山北薄於海越王謂范蠡曰孤獲辱連年勢足以
死得相國之策再返南鄉今欲定國立城人民不足
其功不可以興為之奈何范蠡對曰唐虞卜地夏殷
封國古公營城周雒威折萬里德致八極豈欲破彊
敵收鄰國乎越王曰孤不能承前君之制修德自守
亡衆棲於會稽之山請命乞恩受辱被恥囚結吳宮
幸來歸國追以百里之封將遵前君之意復以會稽
之上而宜釋吳之地范蠡曰昔公劉去邠而德彰於

夏竄父讓地而名發於岐今大王欲立國樹都并敵
國之境不處平易之都據四達之地將焉立霸王之
業越王曰寡人之計未有決定欲築城立郭分設里
閭委屬於相國於是范蠡乃觀天文擬法於紫宮築
作小城周千一百二十一步一圓三方西北立龍飛
翼之樓以象天門東南伏漏石竇以象地戶陵門四
達以象八風外郭築城而缺西北示服事吳也不敢
壅塞內以取吳故缺西北而吳不知也北向稱臣委

命吳國左右易處不得其位明臣屬也城既成而怪
山自生者瑯琊東武海中山也一夕自來故名怪山
范蠡曰臣之築城也其應天矣崑崙之象存焉越王
曰寡人聞崑崙之山乃地之林上承皇天氣吐宇內
下處后土稟受無外滋聖生神嘔養帝會故五帝處
其陽陸三王居其正地吾之國也偏天地之壤秉東
南之維斗去極北非糞土之城何能與王者比隆盛
哉范蠡曰君徒見外未見內臣乃承天門制城合氣

於后土嶽象已設崑崙故出越之霸也越王曰苟如
相國之言孤之命也范蠡曰天地卒號以著其實名
東武起游臺其上東南為司馬門立層樓冠其山巔
以為靈臺起離宮於淮陽中宿臺在於高平駕臺在
於成丘立苑於樂野燕臺在於石室齋臺在於襟山
句踐之出游也休息食室於水厨越王乃召相國范
蠡大夫種大夫郢問曰孤欲以今日上明堂臨國政
專恩致令以撫百姓何日可也惟三聖紀綱維持范

蠡曰今日丙午日也丙陽將也是日吉矣又因良時
臣愚以為可無始有終得天下之中大夫種曰前車
已覆後車必戒願王深察范蠡曰夫子故不一二見
也吾王今以丙午復初臨政解救其本是一宜夫金
制始而火救其終是二宜蓄金之憂轉而及水是三
宜君臣有差不失其理是四宜王相俱起天下立矣
是五宜臣願急升明堂臨政越王是日立政翼翼小
心出不敢奢入不敢侈越王念復吳仇非一日也苦

身勞心夜以接日目卧則攻之以蓼足寒則漬之以
水冬常抱冰夏還握火愁心苦志懸膽於戶出入嘗
之不絕於口中夜潛泣泣而復嘯越王曰吳王好服
吾欲采葛使女工織細布獻之以求吳王之心於子
何如羣臣曰善乃使國中男女入山采葛以作黃絲
之布欲獻之未及遣使吳王聞越王盡心自守食不
重味衣不重綵雖有五臺之游未嘗一日登翫因賜
之以書增封東至於句甬西至於檣李南至於姑末

即姑蔑
今衢州

北至於平原

越絕作武原
今海鹽縣

縱橫八百餘里越

王乃使大夫種索葛布十萬甘蜜九黨文筭七枚狐
皮五雙晉竹十廋以復封禮吳王得之曰以越僻狃
之國無珍今舉其貢貨而以復禮此越小心念切不忘
吳之效也夫越本國千里吾雖封之未盡其國子胥
聞之退卧於舍謂侍者曰吾君失其石室之囚縱於
南林之中但因虎豹之野而與荒外之草于吾之心
其無損也吳王得葛布之獻乃復增越之封賜羽毛

之飾几杖諸侯之服越國大悅采葛之婦傷越王用

心之苦乃作何苦之詩曰

一作若何之歌

葛不連蔓莢台台

我君心苦命更之嘗膽不苦甘如飴令我采葛以作

絲女工織兮不敢遲弱於羅兮輕霏霏號絺素兮將

獻之越王悅兮忘罪除

一作辜

吳王歡兮飛尺書增封

益地賜羽奇

一作旂

几杖茵褥諸侯儀羣臣拜舞天顏

舒我王何憂能不移於是越王內修其德外布其道

君不名教臣不名謀民不名使官不名事國中蕩蕩

無有政令越王內實府庫墾其田疇民富國強衆安
道泰越王遂師八臣四友時問政焉大夫種曰愛民
而已越王曰奈何種曰利之無害成之無敗生之無
殺與之無奪越王曰願聞種曰無奪民所好則利之
民不失其時則成之省刑去罰則生之薄其賦斂則
與之無多臺游則樂之靜而無苛則喜之民失所好
則害之農失其時則敗之有罪不赦則殺之重賦厚
斂則奪之多作臺游以罷民則苦之勞擾民力則怒

之臣聞善為國者遇民如父母之愛其子如兄之愛其弟聞有饑寒為之哀見其勞苦為之悲越王乃緩刑薄罰省其賦斂於是人民殷富皆有帶甲之勇九年正月越王召五大夫而告之曰昔者越棄宗廟身為窮虜恥聞天下辱流諸侯今寡人念吳猶蹕者不忘走盲者不忘視孤未知策謀惟大夫誨之扶同曰昔之亡國天下莫不聞今欲有計不宜前露其辭臣聞猛獸將擊必弭毛帖伏鷙鳥將搏必卑飛戢翼聖

人將動必順辭和衆聖人之謀不可見其象不可知其情臨事而伐故前無剽過之兵後無伏襲之患今大王臨敵破吳宜損之辭無令泄也臣聞吳王兵彊於齊晉而怨結於楚大王宜親於齊深結於晉陰固於楚而厚事於吳夫吳之志猛驕而自矜必輕諸侯而凌鄰國三國還敵必角勢交爭越承其弊因而伐之可克也雖五帝之兵無以過此范蠡曰臣聞謀國破敵動觀其符孟津之會諸侯曰可武王辭之方今

吳楚結仇構怨不解齊雖不親外為其救晉雖不附
猶效其義夫內臣謀而決仇其策鄰國通而不絕其
援斯正吳之興霸諸侯之上尊臣聞峻高者隤茂葉
者摧日中則移月滿則虧四時不並盛五行不俱馳
陰陽更唱氣有盛衰故溢堤之水不淹其量燭乾之
火不復其熾水靜則無漚潒之怒火消則無熹毛之
熱今吳秉諸侯之威以號令於天下不知德薄而恩
淺道狹而怨廣權懸而智衰力竭而威折兵挫而軍

退士散而衆解臣請按師整兵待其壞敗隨而襲之
兵不血刃士不旋踵吳之君臣為虜矣臣願大王匿
聲無見其動以觀其靜大夫苦成曰夫水能浮草木
亦能沈之地能生萬物亦能殺之江海能下谿谷亦
能朝之聖人能從衆亦能使之今吳承闔閭之軍制
子胥之典教政平未虧戰勝未敗大夫詬者狂佞之
人達於策慮輕於朝事子胥力於戰伐死於諫議二
人權必有壞願王虛心自匿無示謀計則吳可滅矣

大夫浩曰今吳君驕臣奢民飽軍勇外有侵境之敵
內有爭臣之震其可攻也大夫句如曰天有四時人
有五勝昔湯武乘四時之利而制夏殷桓繆據五勝
之便而列六國此乘其時而勝者也王曰未有四時
之利五勝之便願各就職也

越絕書

枕中

句踐問范子曰古之賢主聖王之治何

左何右何去何取范子對曰臣聞聖主之治左道右
術去末取實越王曰何謂道何謂術何謂末何謂實

范子對曰道者天地先生不知老曲成萬物不名巧
故謂之道道生氣氣生陰陰生陽陽生天地天地立
然後有寒暑燥濕日月星辰四時而萬物備術者天
意也盛夏之時萬物遂長聖人緣天心助天喜樂萬
物之長故舜彈五絃之琴歌南風之詩而天下治言
其樂與天下同也當是之時頌聲作所謂末者名也
故名過實則百姓不附親賢士不為用而外缺一字諸
侯聖主不為也所謂實者穀富也得人心任賢士也

凡此四者邦之寶也越王曰寡人躬行節儉下士求
賢不使名過實此寡人所能行也多貯穀富百姓此
乃天時水旱寧在一人耶何以備之范子曰百里之
神千里之君湯執其中和舉伊尹收天下雄雋之士
練卒兵率諸侯伐桀為天下除殘去賊萬民皆歌而
歸之是所謂執其中和者越王曰善哉中和所致也
寡人雖不及賢主聖王欲執其中和而行之今諸侯
之地或多或少彊弱不相當兵革暴起何以應之范

子曰知保人之身者可以王天下不知保人之身失天下者也越王曰何謂保人之身范子曰天生萬物而教之而生人得穀即不死穀能生人能殺人故謂人身越王曰善哉今寡人欲保穀為之奈何范子曰欲保必親於野覩諸所多少為備越王曰所少可得為因其貴賤亦有應乎范子曰夫八穀貴賤之法必察天之三表即決矣越王曰請問三表范子曰水之勢勝金陰氣蓄積大盛水據金而死故金中有水如

此者歲大敗八穀皆貴金之勢勝木陽氣蓄積大盛
金據木而死故木中有火如此者歲大美八穀皆賤
金木水火更相勝此天之三表者也不可不察能知
三表可為邦寶不知三表之君千里之神萬里之君
故天下之君發號施令必順於四時四時不正則陰
陽不調寒暑失常如此則歲惡五穀不登聖王施令
必審於四時此至禁也越王曰此寡人所能行也願
欲知圖穀上下貴賤欲與他貨之內以自實為之奈

何范子曰夫八穀之賤也如宿穀之登其明也諦審
察陰陽消息觀市之反覆雌雄之相逐天道乃畢越
王曰何執而昌何行而亡范子曰執其中則昌行奢
侈則亡越王曰寡人欲聞其說范子曰臣聞古之賢
主聖君執中和而原其終始即位安而萬物定矣不
執其中和不原其終始即尊位傾萬物散文武之業
桀紂之跡可知矣古者天子及至諸侯自滅至亡漸
漬乎滋味之費沒溺於聲色之類牽攀於珍怪貴重

之器故其邦空虛困其士民以為須臾之樂百姓皆有悲心瓦解而倍畔者桀紂是也身死邦亡為天下笑此謂行奢侈而亡也湯有七十里地務執三表可謂邦寶不知三表身死棄道

又越王問於范子曰春肅夏寒秋榮冬泄人治使然乎將道也范子曰天道三千五百歲一治一亂終而復始如環之無端此天之常道也四時易次寒暑失常治民然也故天生萬物之時聖人命之曰春春

不生遂者故天不重為春春者夏之父也故春生之
夏長之秋成而殺之冬受而藏之春肅而不生者王
德不究也夏寒而不長者臣下不奉主命也秋順而
復榮者百官刑不斷也冬溫而泄者發府庫賞無功
也此所謂四時者邦之禁也越王曰寒暑不時治在
於人可知也願聞歲之美惡穀之貴賤何以紀之范
子曰夫陰陽錯繆即為惡歲人生失治即為亂世夫
一亂一治天道自然八穀亦一賤一貴極而復反言

亂三千歲必有聖王也八穀貴賤更相勝故死凌生者逆大貴生凌死者順大賤越王曰善

越王苦會稽之恥欲深得民心以致必死於吳身不安枕席口不甘厚味目不視靡曼耳不聽鐘鼓三年苦身勞力焦唇乾肺內親羣臣下養百姓以求其心有甘脆不足分弗敢食有酒流之江與民同之身親耕而食妻親織而衣味禁珍衣禁襲包禁二時出行路從車載食以視孤寡老弱之漬病

公羊傳曰大漬者大病也

困窮顏色愁悴不

贍者必身自食之於是屬諸大夫而告之曰願一與吳
徼天下之衷今吳越之國相與俱殘士大夫履肝肺同
日而死孤與吳王接頸交臂而償此孤之大願也若此
而不可得也內量吾國不足以傷吳外事之諸侯不能
害之則孤將棄國家釋羣臣服劔臂乃變容貌易名姓
執箕箒而臣事之以與吳王爭一旦之死孤雖知要領
不屬首足異處四支布裂為天下笑孤之志必將出焉

呂覽
順民

越絕書

枕中

越王問於范子曰寡人聞人失其魂魄

者死得其魂魄者生物皆有之將人也范子曰人有
之萬物亦然天地之間人最為貴物之生穀為貴以
生人與魂魄無異可得豫知也越王曰其善惡可得
聞乎范子曰欲知八穀之貴賤上下衰極必察其魂
魄視其動靜觀其所舍萬不失一問曰何謂魂魄對
曰魂者橐也魄者生氣之源也故神生者出入無門
上下無根見所而功自存故名之曰神神主生氣之

精魂主元氣之舍也魄者主賤魂者主貴故當安靜而不動魂者方盛夏而行故萬物得以自昌神者主氣之精主貴而雲行故方盛夏之時不行即神氣槁而不成物矣故死凌生者歲大敗生凌死者歲大美故觀其魂魄即知歲之善惡矣越王問曰寡人聞陰陽之治不同力而功成不同氣而物生可得而知乎願聞其說范子曰臣聞陰陽不同處萬物生焉冬三月之時草木既死萬物各異藏故陽氣避之下藏伏

壯於內使陰陽得成功於外夏三月盛暑之時萬物
遂長陰氣避下藏伏壯於內然而萬物親而信之是
所謂也陽者主生萬物方夏三月之時大熱不至則
萬物不能成陰氣主殺方冬三月之時地不內藏則
根荄不成即春無生故一時失度即四序為不行越
王曰善寡人已間陰陽之事穀之貴賤可得而知乎
范子曰陽者主貴陰者主賤故當寒而不寒者穀為
之暴貴當溫而不溫者穀為之暴賤譬猶形影聲響

相聞豈得不復哉故曰秋冬貴陽氣施於陰陰極而復貴春夏賤陰氣施於陽陽極而不復越王曰善哉以丹書帛置之枕中以為國寶

越絕書

枕中

越五日因於吳請於范子曰寡人守國

無術負於萬物幾危社稷為旁邦所議無定足而立欲捐軀出死以報吳仇為之奈何范子曰臣聞聖主為不可為之行不惡人之謗己為足舉之德不德人之稱己舜循之歷山而天下從風使舜釋其所循而

求天下之利則恐不全其身昔者神農之治天下務利之而已矣不望其報不貪天下之財而天下共富之所以其智能自貴於人而天下共尊之故曰富貴者天下所置不可奪也今王利地貪財接兵血刃僵尸流血欲以顯於世不亦謬乎越王曰上不逮於神農下不及於堯舜今子以至聖之道說寡人誠非所及也且吾聞之也父辱則子死君辱則臣死今寡人親已辱於吳矣欲行一切之變以復吾仇願子更為

寡人圖之范子曰君辱則死固其義也立死下士人而求成邦者上聖之計也且夫廣天下尊萬乘之主使百姓安其居樂其業者唯兵兵之要在於人人之要在於穀故民衆則主安穀多則兵彊王而備此二者然後可以圖之也越王曰吾欲富邦彊兵地狹民少奈何為之范子曰夫陽動於上以成天文陰動於下以成地理審察開置之要可以為富凡欲先知天門開及地戶開其術天高五寸減天寸六分以成地

謹司八穀初見出於天者是謂天門開地戶閉陽氣
不得下入地戶故氣轉動而上下陰陽俱絕八穀不
成大貴不應其歲而起此天變見符也謹司八穀初
見入於地者是謂地戶閉陰陽俱會八穀大成其歲
大賤來年大饑此地變見端也謹司八穀初見半於
人者糴平熟無災害故天倡而見符地應而見瑞聖
人上知天下知地中知人此之謂天平地平以此為

天圖

漢書兵權謀范蠡
二篇大夫種二篇

吳越春秋 越王句踐十年二月王深念侵辱於吳
蒙天祉福得返越國羣臣教誨各畫一策辭合意同
句踐敬從其國已富反越五年未聞敢死之友或謂
諸大夫愛身惜軀者乃登漸臺觀其羣臣有憂與否
相國大夫種句如之屬儼然列坐雖懷憂患不形顏
色越王即鳴鐘驚櫓而召羣臣與之盟曰寡人獲辱
受恥上愧周王下慚晉楚幸蒙諸大夫之策得返國
修政富民養士而五年未聞敢死之士雪仇之臣奈

何而有功乎羣臣默然莫對者越王仰天嘆曰孤聞
主憂臣辱主辱臣死今孤親被奴虜之厄受囚破之
恥不能自輔須賢任仁然後討吳重負諸臣大夫何
易見而難使也於是計硯年少官卑列坐於後乃舉
手而趨蹈席而前進曰謬哉君王之言也非大夫易
見而難使君王之不能使也越王曰何謂計硯曰夫
官位財幣金賞者君之所輕也操鋒履刃受命投死
者士之所重也今王易財之所輕易宜而責士之所

重何其殆哉於是越王默然不悅面有愧色即辭羣臣進計硯而問曰孤之所得士心者何等計硯對曰夫君人尊其仁義者治之門也士民者君之根也開門固根莫如正身正身之道謹左右左右者君之所盛衰者也願王明選左右得賢而已昔太公九聲而足足字誤磻溪之餓人也西伯任之而王管仲魯之亡囚有貪分之毀齊桓得之而霸故傳曰失士者亡得士者昌願王審於左右何患羣臣之不使也越王

曰吾使賢任能各殊其事孤虛心高望冀聞報復之
謀今咸匿聲隱形不聞其語厥咎安在計硯曰選賢
實士各有一等遠使以難以效其誠內告以匿以知
其信與之論事以觀其智飲之以酒以視其亂指之
以使以察其能示之以色以別其態五色以設士盡
其實人竭其智知其竭智盡實則君臣何憂越王曰
吾以謀士效實人盡其智而士有未盡進辭有益寡
人也計硯曰范蠡明而知內文種遠以見外願王請

大夫種與深議則霸王之術在矣越王乃請大夫種而問曰吾昔日受夫子之言自免於窮厄之地今欲奉不羈之計以雪吾之宿仇何行而功乎大夫種曰臣聞高飛之鳥死於美食深泉之魚死於芳餌今欲伐吳必前求其所好參其所願然後能得其實越王曰人之所好雖其願何以定而制之死乎大夫種曰夫欲報怨復仇破吳滅敵者有九術君王察焉越王曰寡人被辱懷憂內慙朝臣外愧諸侯中心迷惑精

神空虛雖有九術安能知之大夫種曰夫九術者湯
文得之以王桓穆得之以霸其攻城取邑易於脫屣
願大王覽之一曰尊天事鬼以求其福二曰重財幣
以遺其君多貨賄以喜其臣三曰貴糴粟橐以虛其
國利所欲以疲其民四曰遺美女以惑其心而亂其
謀五曰遺之巧工良材使之起宮室以盡其財六曰
遺之諛臣使之易伐七曰彊其諫臣使之自殺八曰
君王國富而備利器九曰利甲兵以承其弊凡此九

術君王閉口無傳守之以神取天下不難而況於吳乎越王曰善乃行第一術立東郊以祭陽名曰東皇公立西郊以祭陰名曰西王母祭陵山於會稽祀水澤於江州事鬼神一年國不被災越王曰善哉大夫之術願論其餘種曰吳王好起宮室用工不輟王選名山神材奉而獻之越王乃使木工千餘人入山伐木一年師無所幸作士思歸皆有怨望之心而歌木客之吟一夜天生神木一雙大二十圍長五十尋陽

為文梓陰為榱桷巧工施校制以規繩雕治圓轉刻
削磨礱分以丹青錯畫文章嬰以白璧鏤以黃金伏
類龍蛇文采生光乃使大夫種獻之於吳王曰東海
役臣臣孤句踐使臣種敢因下吏聞於左右賴大王
之力竊為小殿有餘材謹再拜獻之吳王大悅子胥
諫曰王勿受也昔者桀起靈臺紂起鹿臺陰陽不和
寒暑不時五穀不熟天與其災民虛國變遂取滅亡
大王受之必為越王所戮吳王不聽遂受而起姑蘇

之臺三年聚材五年乃成高見二百里行路之人道
死巷哭不絕嗟嘻之聲民疲士苦人不聊生越王曰
善哉第二術也 十一年越王欲伐吳乃問計硯曰
吾欲伐吳恐不能破惟問於子計硯對曰夫興師舉
兵必且內蓄五穀實其金銀滿其府庫勵其甲兵凡
此四者必察天地之氣原於陰陽明於孤虛審於存
亡乃可量敵越王曰天地存亡其要奈何計硯曰天
地之氣物有死生原陰陽者物貴賤也明孤虛者知

會際也審存亡者別真偽也越王曰何謂死生真偽
乎計碗曰春種八穀夏長而養秋成而聚冬蓄而藏
夫天時有生而不救種是一死也夏長無苗二死也
秋成無聚三死也冬藏無蓄四死也雖有堯舜之德
無如之何夫天時有生勸者老作者少反氣應數不
失厥理一生也留意省察謹除苗穢穢除苗盛二生
也前時設備物至則收國無逋稅民無失穗三生也
倉已封塗除陳入新君樂臣歡男女及信四生也夫

陰陽者太陽所居之歲留息三年貴賤見矣夫孤虛者謂天門地戶也存亡者君之道德也越王曰何子之年少於物之長也計硯曰有美之士不拘長少越王曰善哉子之道也乃仰觀天文集察緯宿歷象四時以下者上虛設八倉從陰收著望陽出糶策其極計三年五倍越國熾富句踐嘆曰吾之霸矣善計硯之謀也十二年越王謂大夫種曰孤聞吳王淫而好色惑亂沉湎不領政事因此而謀可乎種曰可破

夫吳王淫而好色宰嚭佞以曳心往獻美女其必受

之惟王選擇美女二人而進之越王曰善乃使相者

國中得苧蘿山鬻薪之女曰西施鄭旦

苧蘿山在諸暨縣南山下

有西施浣沙石

孔臬會稽記諸暨縣北界有羅山

越時西施鄭旦本處名苧蘿村所在有方石是西施

曬紗處今

名苧蘿山飾以羅縠教以容步習於土城臨於都巷

三年學服而獻於吳乃使相國范蠡進曰越王句踐

竊有二遺女越國洿下困迫不敢稽留謹使臣蠡獻

之大王不以鄙陋寢容願納以供箕帚之用吳王大

悅曰越貢二女乃句踐盡忠於吳之證也子胥諫曰
不可王勿受也臣聞五色令人目盲五音令人耳聾
昔桀易湯而滅紂易文王而亡大王受之後必有殃
臣聞越王朝晝不倦晦誦竟夜且聚敢死之士數萬
是人不死必得其願越王服誠行仁聽諫進賢是人
不死必成其名越王夏被毛裘冬御絺綌是人不死
必為對隙臣聞賢士國之寶美女國之咎夏亡以妹
喜殷亡以妲己周亡以褒姒吳王不聽遂受其女越

王曰善哉第三術也

史記 西施越之美女越王勾踐以獻之吳王夫差
幸之每入市人願見者先輸金錢一文 孟子注疏
引今本無

越絕書 丘土城勾踐所習教美女西施鄭旦宮臺
也女出於苧蘿山欲獻於吳自謂東垂僻陋恐女樸
鄙故近大道居

述異記 香水溪俗云西施浴處人呼為脂粉塘吳

王宮人濯粧於此溪上源至今馨香 吳王夫差築
姑蘇之臺三年乃成周旋佶屈橫亘五里崇飾土木
殫耗人力宮妓數千人上別立春宵宮為長夜之飲
造千石酒鍾夫差作天池池中造青龍舟舟中盛陳
妓樂日與西施為水嬉吳王於宮中作海靈館館娃
閣銅溝玉檻宮之楹檻珠玉飾之 梧桐園在吳宮
本吳王夫差舊園也一名鳴琴川 十三年越王謂
大夫種曰孤蒙子之術所圖者吉未嘗有不合也今

欲復謀吳奈何種曰君王自陳越國微鄙年穀不登
願王請糴以卜其意天若棄吳必許王矣越乃使大
夫種於吳因宰嚭求見吳王辭曰越國洿下水旱不
調年穀不登人民饑乏道薦饑饉願從大王請糴來
歲即復太倉惟大王救其窮窘吳王曰越王信誠守
道不懷二心今窮歸愬吾豈愛惜財寶奪其所願子
胥諫曰不可非吳有越越必有吳吉往則凶來是養
生寇而破國家者也與之不為親不與未成寃且越

有聖臣范蠡勇以善謀將有修飾攻戰以伺吾間觀
越王之使來請糴者非國貧民困而請糴也以入吾
國伺吾王間也吳王曰寡人卑服越王而有其衆壞
其社稷以愧勾踐勾踐氣服為駕車却行馬前諸侯
莫不聞知今吾使之歸國奉其宗廟復其社稷豈有
反吾之心乎子胥曰臣聞士窮非難抑心下人其後
有激人之色越國饑餓民之困窮可因而破也今不
用天之道順地之理而反輸之食固狐雉之相戲也

夫狐卑體而雉信之故狐得其志而雉死可不慎哉
吳王曰句踐國憂而寡人給之以粟恩往義來亦何
憂乎子胥曰臣聞狼子有野心仇讎不可親虎不可
餽以食蝮蛇不恣其意今大王損國家之福以饒無
益之讎棄忠臣之言而順敵人之欲臣必見越之破
吳豸鹿游於姑蘇之臺荆榛蔓於宮闕願王覽武王
伐紂之事太宰嚭從旁對曰武王非紂王臣耶率諸
侯以伐其君雖勝可謂義乎子胥曰武王即成其名

太宰嚭曰親戮主以為名吾不忍也子胥曰盜國者封侯盜金者誅令使武王失其理則周何為三家之

表

謂箕子比干商容

太宰嚭曰子胥為人臣徒欲干君之好

拂君之心以自稱滿君何不知過乎子胥曰太宰嚭前縱石室之囚受其寶女之遺外交敵國內惑於君大王察之無為羣小所侮譬若浴嬰兒雖啼無聽宰嚭之言吳王曰宰嚭子無乃聞寡人言非忠臣之道類佞諂之人太宰嚭曰臣聞鄰國有急千里馳救是

乃王者封亡國之後五霸輔絕滅之末者也吳王乃與越粟萬石而令之曰寡人逆羣臣之議而輸於越年豐而歸寡人大夫種曰臣奉使返越歲登誠還吳貸大夫種歸越越國羣臣皆稱萬歲即以粟賞賜羣臣及於萬民二年越稔擇精粟而蒸還於吳復斗斛之數使大夫種歸之吳王王得越粟長太息謂太宰嚭曰越地肥沃其種甚嘉可留使吾民植之於是吳種越粟粟種無生者吳民大饑越王曰彼窮可攻也

大夫種曰未可國始貧耳忠臣尚在天氣未見須俟其時越王又問相國范蠡曰孤有報復之謀水戰則乘舟陸行則乘輿與舟之利頓於兵弩今子為寡人謀事莫不謬者乎范蠡對曰臣聞古之聖人莫不習戰用兵然行陣隊伍軍鼓之事吉凶決在其工今聞越有處女出於南林國人稱善願王請之立可見越王乃使使聘之問以劒戟之術處女將北見於王道逢一翁自稱曰表公問於處女曰吾聞子善劒願一

見之女曰妾不敢有所隱惟公試之於是表公即杖

篠簳竹竹枝上頡橋未墮地女即捷末

藝文類聚引
吳越春秋云

表公即挽林之竹似枯槁未折墮地女

表公則飛上

樹變為白猿遂別去

劍俠傳云表公即挽林杪之竹
似枯槁未折地女接取其末公

操其本而刺女女因舉杖擊之公即飛上樹化為白猿

見越王越王問曰夫劍

之道如之何女曰妾生深林之中長於無人之野無

道不習不達諸侯竊好擊劍之道誦之不休妾非受

於人也而忽自有之越王曰其道如何女曰其道甚

微而易其意甚幽而深道有門戶亦有陰陽開門閉
戶陰衰陽興凡手戰之道內實精神外示安儀見之
似好婦奪之似懼虎布形候氣與神俱往杳之若日
偏如騰兔追形逐影光若彷彿呼吸往來不及法禁
縱橫逆順直復不聞斯道者一人當百百人當萬王
欲試之其驗即見越王即加女號號曰越女乃命五
板之墮長高習之墮當作隊高是人名教軍士當世莫勝越女
之劍於是范蠡復進善射者陳音音楚人也越王請

音而問曰孤聞子善射道何所生音曰臣楚之鄙人
嘗步於射術未能悉知其道越王曰然願子一二其
辭音曰臣聞弩生於弓弓生於彈彈起古之孝子越
王曰孝子彈者奈何音曰古者人民樸質饑食鳥獸
渴飲霧露死則裹以白茅投於中野孝子不忍見父
母為禽獸所食故作彈以守之絕鳥獸之害故歌曰
斷竹續竹飛土逐害之謂也於是神農黃帝弦木為
弧剡木為矢弧矢之利以威四方黃帝之後楚有弧

父弧父者生於楚之荆山生不見父母為兒之時習用弓矢所射無脫以其道傳於羿羿傳逢蒙逢蒙傳於楚琴氏琴氏以為弓矢不足以威天下當是之時

諸侯相伐兵刃交錯弓矢之威不能制服琴氏乃橫

弓著臂

弩柄曰臂

施機設樞加之以力然後諸侯可服琴

氏傳之楚三侯

文選註引此云琴氏傳大魏大魏傳楚三侯

所謂句亶鄂

章人號麋侯翼侯魏侯也

熊渠三子長子康為句亶王紅為鄂王少子執疵為

越章王三侯者未偕王號時所稱也

自楚之三侯傳之靈王累世以桃

弓棘矢而備鄰國自靈王之後射道分流百家能用莫得其正臣前人受之於楚五世於臣矣臣雖不明其道惟王試之越王曰弩之狀何法焉陳音曰郭為方城守臣子也牙為執法守吏卒也牛為中將主內裏也闕為守禦檢去止也錡為侍從聽人主也臂為道路通所使也弓為將軍主重負也弦為軍師禦戰士也矢為飛客主教使也衛為副使正道里也人為受教知可否也縹為都尉執左右也敵為百死不得

駭也鳥不及飛獸不暇走弩之所向無不死也臣之愚劣道悉如此越王曰願聞正射之道音曰臣聞正射之道道衆而微古之聖人射弩未發而前名其所中臣未能如古之聖人請悉其要夫射之道身若戴板頭若激卵左足蹉右足橫左手若附枝右手若抱兒舉弩望敵翕心咽烟與氣俱發得其和平神定思去去止分離右手發機左手不知一身異教豈況雄雌此正射持弩之道也越王曰願聞望敵儀表投分

飛矢之道音曰夫射之道從分望敵合以參連弩有
斗石矢有輕重石取一兩其數乃平遠近高下求之
銖分道具在斯無有遺言越王曰善盡子之道願子
悉以教吾國人音曰道出於天事在於人人之所習
無有不神於是乃使陳音教士習射於北郊之外三
月軍士皆能用弓弩之巧陳音死越王傷之葬於國
西號其葬所曰陳音山

在山陰縣 越絕書麻林山
句踐欲伐吳種麻為弓弦使

齊人
守之

拾遺記

周靈王

越謀滅吳蓄天下奇寶美人異味進於

吳殺三牲以祈天地殺龍蛇以祠川岳矯以江南億

萬戶民輸吳為傭保越又有美女二人一名夷光二

名修明

即西施鄭旦之別名

以貢於吳吳處以椒華之房貫細

珠為簾幌朝下以蔽景夕捲以待月二人當軒并坐

理鏡靚粧於珠幌之內竊窺者莫不動心驚魂謂之

神人吳王妖惑忘政及越兵入國乃抱二女以逃吳

苑越軍亂入見二女在樹下皆言神女望而不敢侵

今吳城蛇門內有朽株尚為祠神女之處初越王入國有丹鳥夾王而飛故句踐入國起望烏臺言丹鳥之異也范蠡相越日致千金家童閑算術者萬人收四海難得之貨盈積於越都以為器銅鐵之類積如山之阜或藏之井塹謂之寶井奇容麗色溢於閨房謂之遊宮歷古以來未之有也

越王句踐一決獄不辜援龍淵而切其股血流至足以

自罰也而戰士必其死

淮南子人間

墨子 昔越王句踐好士之勇教馴其臣和合之焚舟失火試其士曰越王之寶盡在此越王親自鼓其士而進之曰士聞鼓音破碎亂行蹈火而死者左右百人有餘越王擊金而退之

越王將復吳而試其教燔臺而鼓之使民赴火者賞臨江而鼓之使民赴水者賞一日句踐見怒鼃而武之御者曰何為武王曰鼃有氣如此可無武乎士人聞之曰鼃有氣王猶為武況士人有勇者乎是歲人有自剄死

以其頭獻者

韓子內儲上

吳越春秋

越王念吳欲復讎愁心苦志中夜抱柱

而哭承之以嘯羣臣聞之曰君王何愁心之甚也夫

復讎謀敵非君王之憂自臣下之急務也

藝文引

越絕書

計碗

句踐脅諸臣而與之盟曰吾欲伐吳奈

何有功羣臣默然無對王曰夫主憂臣辱主辱臣死

何大夫易見而難使也計碗官卑年少其居在後舉

首而起曰殆哉非大夫易見難使是大王不能使臣

也王曰何謂也計硯對曰夫官位財幣王之所輕死者士之所重王愛所輕責士所重豈不艱哉王自揖進計硯而問焉計硯對曰夫仁義者治之門士民者君之根本也閭門固根莫如正身正身之道謹選左右左右選則孔主日益上不選則孔主日益下二者貴質浸之漸也願君王公選於衆精鍊左右非君子至誠之人無與居使邪僻之氣無漸以生仁義之行有階人知其能官知其治爵賞刑罰一由君出則臣

下不敢毀譽以言無功者不敢干治故明主用人不由所從不問其先說取一焉是故周文齊桓躬於任賢太公管仲明於知人今則不然臣故曰殆哉越王勃然曰孤聞齊威淫佚九合諸侯一匡天下蓋管仲之力也寡人雖愚惟在大夫計碗對曰齊桓除管仲罪大責任之至易此故南陽蒼句太公九十而不伐磻溪之餓人也聖人不計其辱以為賢者一乎仲二乎仲斯可致王但霸何足道桓稱仲父文稱太公計

此二人曾無跬步之勞大呼之功乃忘弓矢之怨授
以上卿傳曰直能三公今置臣而不尊使賢而不用
譬如門戶像設倚而相欺蓋智士所恥賢者所羞君
王察之越王曰誠者不能匿其辭大夫既在何須言
哉計碗曰臣聞智者不妄言以成其勞賢者始於難
動終於有成傳曰易之謙遜對過問抑威權勢利器
不可示人言賞罰由君此之謂也故賢君用臣畧責
於絕施之職而成其功遠使以效其誠內告以匿以

知其信與之講事以觀其智飲之以酒以觀其態選
士以備不肖者無所置越王大愧乃壞池填塹開倉
穀貸貧乏使羣臣身問疾病躬視死喪不厄窮僻尊
有德與民同苦樂激河井泉示不獨食行之六年士
民一心不謀同辭不呼自來皆欲伐吳

越絕書

內經

句踐既得返國欲陰圖吳乃召計硯而

問焉曰吾欲伐吳恐未能取山林幽冥不知利害所
在西則迫江東則薄海水屬蒼天下不知所止交錯

相過波濤瀆流沈而復起動作若驚駭聲音若雷霆
船失不能救不知命之所維念樓船之苦涕泣不可
止非不欲為也謀不成而息恐為天下咎以敵攻敵
未知誰負吾聞先生明於時交察於道理恐動而無
功故問其道計碗曰是固不可興師者必須先蓄積
食錢布帛不先蓄積則士卒數饑饉則易傷重遲不
可戰戰則耳目不聰明什部之不能使退之不能解
進之不能行饑饉不可以動神氣去而萬里伏弩而

乳郅頭而皇皇彊弩不發不能當旁軍見弱走之
如犬逐羊伏地而死前頓後僵與人同戰獨受天殃
未必天之罪也亦在其將王興師以年數恐一旦而
亡筋骨為野越王曰善請問其方吾聞先生明於治
歲萬物盡長子明以告我寡人弗敢忘計碗曰凡人
生或老或弱或彊或怯不早備生不能相葬王其審
之必先省賦斂勸農桑饑饉在問或水或塘因熟積
以備四方師出無時未知所當應變而動隨物常羊

常羊猶
徜徉

卒然有師彼日以弱我日以彊得世之和擅

世之陽王無忽忘慎無如會稽之饑不可再更嘗言
息貨王不聽臣故退而不言處於吳楚越之間以魚
三邦之利乃知天下之易反也臣聞君自耕夫人自
織此竭於用力而不斷時與智也時斷則循智斷則
備知此二者形於體萬物之情短長逆順可觀而已
臣聞炎帝有天下以傳黃帝黃帝上事天下治地故
少昊治西方蚩尤佐之使主金玄冥治北方白辯佐

之使主水太皞治東方表何佐之使主木祝融治南方僕程佐之使主火后土治中央后稷佐之使主土並有五方以為綱紀是為易地而輔萬物之常王審用臣之議大則可王小則可霸於何有哉越王曰請問其要計硯曰太陰三歲處金則穰三歲處水則毀三歲處木則康三歲處火則旱故散有時積糴有時領則決萬物不過三歲而發矣以智論之以決斷之以道佐之斷長續短一歲再倍其次一倍其次而反

水則資車旱則資舟物之理也天下六歲一穰六歲
一康凡十二歲一饑是以民相離也故聖人早知天
地之反為之預備故湯之時比七年旱而民不饑禹
之時比九年水而民不流其主能通習源流以任賢
使能則轉轂乎千里外貨可來也不習則百里之內
不可致也人主所求其價十倍其所擇者則無價矣
夫人主利源流非必身為之也視民所不足及其有
餘為之命以利之而來諸侯守法度任賢使能償其

成事傳其驗而已如此則邦富兵彊而不衰矣羣臣
無空恭之禮淫佚之行務於有道術不習源流又不
任賢使能諫者則誅則邦貧兵弱刑繁則羣臣多空
恭之禮淫佚之行矣夫諛者反有德忠者反有刑去
刑就德人之情也邦貧兵弱致亂雖有聖臣亦不諫
也務在諛主而已矣今夫民有明父母亦如邦有明
主父母利源流明其法術以任賢子微成其事而已
則家富而不衰不能利源流又不任賢子賢子有諫

者憎之如此者不習於道術也愈信其意而行其言
後雖有敗不自過也夫父子之為親也非得諫諫
而不聽家貧致亂雖有聖子亦不治也務在於諛之
而已父子不和兄弟不調雖欲富也必貧而日衰越
王曰善子何年少於物之長也計硯曰人固不同慧
種生聖痴種生狂桂實生桂桐實生桐先生者未必
能知後生者未必不能明是故聖王置臣不以少長
有道者進無道者退愚者日以退聖者日以長人主

無私賞者有功越王曰善論事若是其審也物有妖
祥乎計碗曰有陰陽萬物各有紀綱日月星辰刑德
變為吉凶金木水火土更勝月朔更建莫主其常順
之有德逆之有殃是故聖人能明其刑而處其鄉從
其德而避其衡凡舉百事必順天地四時參以陰陽
用之不審舉事有殃人主不如卧之頃也欲變天地
之常數發無道故貧而命不長是以聖人并包而陰
行之以感愚夫衆人容容盡欲富貴莫知其鄉越王

曰善請問其方計硯曰從寅至未陽也太陰在陽歲
德在陰歲美在是聖人動而應之制其收發當以太
陰在陰而發陰且盡之歲亟賣六畜貨財以益收五
穀以應陽之至也陽且盡之歲亟發糴以收田宅牛
馬積斂貨財聚棺木以應陰之至也此皆十倍者也
其次五倍天有時而散是故聖人反其刑順其衡收
斂而不散越王曰善今歲比熟尚有貧乞者何也計
硯曰是故不等猶同母之人異父之子動作不同術

貧富故不等如此者積負於人不能救其前後志意
侵下作務日給非有道術又無上賜貧乞故久長越
王曰善大夫佚同若成

若當
作苦

嘗與孤議於會稽石室

孤非其言也今大夫言獨與孤比請遂受教焉計硯
曰糴石二十則傷農九十則病末農傷則草木不辟
末病則貨不出故糴高不過八十下不過三十農末
俱利矣故古之治邦者本之貨物官市開而至越王
曰善計硯乃傳其教而圖之傳之後世以為法治江

南七年而擒吳也甲貸之戶曰粱為上物賈七十乙
貸之戶曰黍為中物石六十丙貸之戶曰赤豆為下
物石五十丁貸之戶曰稻粟令為上種石四十戊貸
之戶曰麥為中物石三十己貸之戶曰大豆為下物
石二十庚貸之戶曰穰比䟽食故無賈辛貸之戶曰
菓比䟽食無賈壬癸無貸

句踐困於會稽之上乃用范蠡計然

計然葵丘濮上人姓辛氏字文子其

先晉國亡公子也嘗南遊於楚范蠡師事之

計然曰知鬪則修備時用則知

物二者形則萬貨之情可得而觀已故歲在金穰水毀

木饑火旱旱則資舟水則資車物之理也六歲穰六年

旱十二歲一大饑夫糶二十病農九十病末

米斗值二十則病農

值九十則病商賈

末病則財不出農病則草不辟矣上不過八

十下不減三十則農末俱利平糶齊物闕市不乏治國

之道也積著之理務完物無息幣以物相貿易腐敗而

食之貨勿留無敢居貴論其有餘不足則知貴賤貴上

極則反賤賤下極則反貴貴出無糞土賤取如珠玉財

幣欲其行如流水修之十年國富厚賂戰士士赴矢石

如渴得飲遂報彊吳觀兵中國號稱五霸

史貨殖傳

范子

計然

計然本葵丘濮上人姓辛名文子其先

晉國公子也為人有內無外形狀似不及人少而明
學陰陽見微而知著其行浩浩其志汎汎不肯自顯
諸侯陰取所利者七國天下莫知故稱曰計然時遼
遊海澤號曰漁父范蠡請見越王計然曰越王為人
烏喙不可同利也 范子問何用九宮計然曰陰陽

之道非獨於一物也聖人之變如水隨形形平則平
形險則險五穀者萬民之命國之重寶故無道之
君及無道之民不能積其盛有餘之時以待其衰不
足也德取象於春夏刑取象於秋冬

越絕書 獨婦山者句踐將伐吳徙寡婦致獨山上
以為死士示得專一也後之說者蓋句踐所以遊軍
士也防塢者越所以遏吳軍也雞山豕山者句
踐以畜雞豕將伐吳以食士也浙江南路西城者

范蠡敦兵城也其陵固可守故謂之固陵 舟室者
句踐船宮也 石塘者越所害軍船也塘廣六十五
步長三百五十三步 杭塢者句踐杭也二百石長
員卒七士人度之會夷 巫里句踐所徙巫為一里
巫山者越魘神巫之官也死葬其上江東中巫葬
者越神巫無杜子孫也死句踐於中江而葬之巫神
欲使覆禍吳人船

述異記 句踐得范蠡之謀乃示民以耕桑延四方

之士作臺於外而館賢士今會稽山有越王臺今交
州麻林一名紆林句踐種麻將以弦弓交州糠頭山
句踐貯米於其上春積糠為山今會稽之上有越王
鑄劍洲箭鏃洲往往有得古箭鏃蓋古制也

越絕書 龜山者句踐起怪游臺也東南司馬門因
以炤龜又仰望天氣觀天怪也高四十六丈五尺二
寸周五百三十二步一曰怪山怪山者往古一夜自
來民怪之故謂怪山 樂野者越之弋獵處大樂故

謂樂野其山上石室句踐所休謀也 東郭外南小城者句踐冰室句踐之出入也齋於稷山往從田里去從北郭門炤龜龜山更駕臺馳於離丘遊於美人宮興樂中宿過歷馬丘射於樂野之衢走犬若邪休謀石室食於冰厨領功銓土已作昌土臺藏其形隱其情一曰冰室者所以備膳羞也 北郭外路南溪北城者句踐築鼓鐘宮也 葛山者句踐罷吳種葛使越女織治葛布獻於吳王夫差 犬山者句踐罷

吳畜犬獵南山白鹿欲得獻吳神不可得故曰犬山
其高為犬亭 六山者句踐鑄銅鑄銅不爍埋之東
坂其上馬箠句踐遣使者取於南社徙種六山飾治
為馬箠獻之吳 姑中山者越銅官之山也越人謂
之銅姑瀆長二百五十里 朱餘者越鹽官也越人
謂鹽曰餘 官瀆者句踐工官也 富中大塘者句
踐治以為義田為肥饒謂之富中

越絕書 越王句踐反國六年皆得士民之衆而欲

伐吳於是乃使之維甲維甲者治甲系斷修內矛赤雞稽繇者也越人謂人鍛也方舟航買儀塵者越人往如江也治須慮者越人謂船為須慮亟怒紛紛者怒貌也怒至士擊高文者躍勇士也習之於夷夷海也宿之於萊萊野也致之於單單者堵也

越國大饑王恐召范蠡而謀范蠡曰王何患焉今之饑此越之福而吳之禍也夫吳國甚富而財有餘吳王年少智寡材輕好須臾之名不思後患王若重幣卑辭以

請糴於吳則食可得也食得其卒越必有吳而王何患
焉越王曰善乃使人請食於吳吳王將與之伍子胥進
諫曰不可與也夫吳之與越接土隣境道易人通仇讎
敵戰之國也非吳喪越越必喪吳若燕秦齊晉山處陸
居豈能踰五湖九江越十七阨以有吳哉故曰非吳喪
越越必喪吳今將輸之粟與之食是長吾讎而養吾仇
也財匱而民恐悔無及也不若勿與而攻之固其數也
此昔吾先王之所以霸且夫饑代事也猶淵之與阪誰

國無有吳王曰不然吾聞之義兵不攻服仁者食饑餓
今服而攻之非義兵也饑而不食非仁體也不仁不義
雖得十越吾不為也遂與之食不出三年而吳亦饑使
人請食於越越王弗與

呂覽
長攻

說苑

權謀

越饑勾踐懼四水進諫曰夫饑越之福也

而吳之禍也夫吳國甚富而財有餘其君好名而不
思後患若我卑辭重幣以請糴於吳吳必與我與我
則吳可取也越王從之吳將與之子胥諫曰不可夫

吳越接地鄰境道易通仇讎敵戰之國也非吳有越
越必有吳矣夫齊晉不能越三江五湖以亡吳越不
如因而攻之是吾先王闔廬之所以霸也且夫饑何
哉亦猶淵也敗伐之事誰國無有君若不攻而輸之
糴則利去而凶至財匱而民怨悔無及也吳王曰吾
聞義兵不服仁人不以餓饑而攻之雖得十越吾不
為也遂與糴三年吳亦饑請糴於越越王不與而攻
之遂破吳

句踐自會稽歸七年拊循其士民士民欲用以報吳大
夫逢同諫曰國新流亡今乃復殷給繕飾備利吳必懼
懼則難必至且鷙鳥之擊也必匿其形今吳兵加齊晉
怨深於楚越名高天下實害周室德少而功多必淫自
矜為越計莫若結齊親楚附晉以厚吳吳之志廣必輕
戰是我連其權三國伐之越承其弊可克也句踐曰善
居二年吳王將伐齊子胥諫曰未可臣聞句踐食不重
味與百姓同苦樂此人不死必為國患吳有越腹心之

疾齊與吳疥癢也願王釋齊先越吳王弗聽遂伐齊敗之艾陵虜齊高國以歸讓子胥子胥曰王母喜王怒子胥欲自殺王聞而止之越大夫種曰臣觀吳王政驕矣請試嘗之貸粟以卜其事請貸吳王欲與子胥諫勿與王遂與之越乃私喜子胥言曰王不聽諫後三年吳其墟乎太宰嚭聞之乃數與子胥爭越議因讒子胥曰伍員貌忠而實忍人其父兄不顧安能顧王王前欲伐齊員彊諫已而有功用是反怨王王不備伍員員必為亂

與逢同共謀讒之王王始不從乃使子胥於齊聞其託子於鮑氏王乃大怒曰伍員果欺寡人欲反使人賜子胥屬鏹劍以自殺子胥大笑曰我令而父霸我又立若若初欲分吳國半予我我不受已今若反以讒誅我嗟乎嗟乎人固不能獨立報使者曰必取吾眼置吳東門以觀越兵入也

史越世家

韓非子 越王入宦於吳而勸之伐齊以弊吳吳兵既勝齊人於艾陵張之於江濟強之於黃池故可制

於五湖故曰將欲喻之必固張之將欲弱之必固強之

吳越春秋 句踐十五年謀伐吳

左哀十三年

謂大夫種

曰孤用夫子之策免於天虐之誅還歸於國吾誠已說於國人國人喜悅而子昔日云有天氣即來陳之今豈有應乎種曰吳之所以彊者為有子胥今子胥忠諫而死是天氣前見亡國之證也願君悉心盡意以說國人越王曰

以下畧見國語

寡人不知其力之不足以

大國報仇以暴露百姓之骨於中原此則寡人之罪也寡人誠更其術於是乃葬死問傷弔有憂賀有喜送往迎來除民所害然後卑事夫差往宦士三百人於吳吳封孤數百里之地因約吳國父兄昆弟而誓之曰寡人聞古之賢君四方之民歸之若水寡人不能為政將率二三子夫婦以為藩輔令壯者無娶老妻老者無娶壯婦女子十七未嫁其父母有罪丈夫二十不娶其父母有罪將媿者以告於孤令醫守之

生男二貺之以壺酒一犬生女二賜之以壺酒一豚

犬陽畜
豚陰畜

生子三人孤與乳母生子二人孤與一養長

子死三年釋吾政季子死三月釋吾政必哭泣葬埋
之如吾子也令孤子寡婦疾疹貧病者納官其子欲
仕量其居好其衣飽其食而簡銳之凡四方之士來
者必朝而禮之載飯與羹以游國中國中僮子戲而
遇孤孤哺而啜之施以愛問其名非孤飯不食非夫
人事不衣七年不收於國民家有三年之畜男即歌

樂女即會笑今國之父兄日請於孤曰昔夫差辱吾
君王長為天下所恥今越國富饒君王節儉請可報
恥孤辭之曰昔者我辱也非二三子之罪也如寡人
者何敢勞吾國之人以塞吾之宿仇父兄又復請曰
四封之內盡吾君子子報父仇臣復君隙豈敢有不
盡力者乎臣請復戰以除君王之宿仇孤悅而許之
大夫種曰臣觀吳王得志於齊晉謂當遂涉吾地以
兵臨境今疲師休卒一年而不試以忘於我我不可

以急臣當卜之於天吳民既疲於軍困於戰聞市無
赤米之積國廩空虛其民必有移徙之心寒就蒲羸
於東海之濱夫占兆人事又見於卜筮王若起師以
可會之利犯吳之邊鄙未可往也吳王雖無伐我之
心亦難動之以怒不如諗其間以知其意越王曰孤
不欲征伐國人請戰者三年矣吾不得不從民人之
欲於是乃大會卒臣而令之曰有敢諫伐吳者罪不
赦蠡種相謂曰吾諫已不合矣猶聽君王之令越王

會軍列士而誓之曰寡人聞古之賢君不患其衆之
不足而患其志行之少恥也今夫差衣水犀甲者十
有三萬人不患其志行之少恥也而患其衆之不足
今寡人將助天威吾不欲匹夫之小勇也吾欲士卒
進則思賞退則避刑於是越民父勉其子兄勸其弟
曰吳可伐也文冗不若國語越王復召范蠡謂曰吳已殺子
胥導諛者衆吾國之民又勸孤伐吳其可伐乎范蠡
曰未可須明年之春王曰何也范蠡曰臣聞吳王北

會諸侯於黃池精兵從王國中空腹老弱在後太子
留守兵出境未遠聞越掩其空腹兵還不難也不如
來春其夏六月丙子句踐復問范蠡曰可伐矣乃發
習流二千人俊士四萬君子六千
君子謂君所子養者諸御千
人以乙酉與吳戰丙戌遂虜殺太子丁亥入吳焚姑
胥臺吳告急於夫差夫差方會諸侯於黃池恐天下
聞之即密不令洩已盟乃使人請成於越句踐自度
未能滅吳乃與吳平

越王問於大夫種曰吾欲伐吳可乎對曰可矣吾賞厚而信罰嚴而必君欲知之何不試焚宮室於是遂焚宮室人莫救之乃下令曰人之救火死者比死敵之賞救火而不死者比勝敵之賞不救火者比北降之罪人塗其體被濡衣而赴火者左三千人右三千人此知必勝之勢也

二贈
內
能
上

春秋戰國異辭卷五十二